

٤٩٢٥٨

تتروقه الروم

مينا فايز

سروقت الروم

مينا فايز
الطبعة الأولى ٢٠١٣

دار روعة للطبع والنشر والتوزيع

المدير العام : هبة الشرقاوي
موبايل : ٠١١٤٠١٧٨١٤٤
darrawaa@yahoo.com

الاخراج الفني
أيمن دويدار

الغلاف
عبد الرحمن حافظ

رقم الإيداع
٢٠١٣/١٠٩٢٨
الترقيم الدولي
٩٧٧-٩-٦٤١١-٨٩-٦ //

مقدمة

انا اسمى مينا فايز " كائن فايساوى " ... فايسى هو اسم الشهرة
الخاص بيا عند كل اللى يعرفنى ويقرب منى .. وبما ان الكتاب
بيعبر عن الكائن الفايساوى وافكاره ومشاعره فكل اللى هيقرأ
الكتاب هيكون قريب منى ودة سبب تسمية الكتاب بـ " فايساويات "
للمرة الثانية انا بعافر عشان افكارى تتولد فى كتاب من خلال
تزاوج قلم وورقة ... للمرة الثانية بحاول عشان بنات افكارى تغازل
عيونك و تحبها ... ولن تكون محاولاتي الاخيرة
مش مهم الفصول مكتوبة بالعامية او بالفصحى .. انا مفكرتش
فى اى قيود شكلية على افكارى .. جمال الفكر فى حريته .. انا
كتبت زى منا حاسس وزى منا عاوز .. وبراهن ان دة هيخليكى وانتا
بتقرأ الفصول حاسس بحرية وعفوية وكأنك قاعد فى كافية مع
الكائن الفايساوى .. متقلقش المشاريب عليا

شروق الروح

كتابى الجديد هو محاولات جديدة من اعماقى للخروج على السطح .. اتمنى ان محاولاتى تكون اقراص تأمل تتناولها باستمتاع وانتا بتقرأ وتخليك قريب من اعماقى ومتحاور مع افكارى وتزيد من ضربات قلبك ضربات زيادة توازى الاحلام والمشاعر والتأملات الموجودة بالكتاب

ارجو التعامل مع صاحب الكتاب على انه شخص عادى بعيد عن المنطق والفلسفة والروتين وانه مجرد شخص يحاول يفكر ومستمتع بالرقصة الحميمة مع الكلمات

من الجميل اننا نفكر ... من الجميل اننا نشوف كل حاجة حوالينا بعيون القلب والعقل ونحس ونفهم ... لا حياة بدون افكار

من الجميل اننا نمح ارواحنا براح للانطلاق بدون قيود من العقل ... من الجميل اننا نشد الشروق من الشمس ونسرق النجوم من الليل عشان خاطر نحلم مهما كانت العتمة .. من الجميل اننا نحاول مهما انكسرنا ومهما اتجرحنا لان المحاولة فى حد ذاتها انتصار لمعنى الحياة جوانا .. الجزء الثانى من كتاب فايساويات هو دعوة لشروق الارواح على عالم متفتح من الافكار والتأملات والافتراضيات ..

استمتعوا ب " شروق الروح "

الله العظيم الابدى

مين هو ربنا فى حياتك ؟؟ ... سؤال جايـز يكون فى اجابته سهل جدا لكن فى معايشة الاجابة تفضل المشكلة ... تعرف اية عن ربنا ؟؟ ... انا مش ناوى ادخل فى الدين ولا اختلافات الاديان السماوية لكن انا ناوى ادخل على حاجة مشتركة ما بين ناس كتير اوى مننا وهى اننا مش حاسيين

الساكن فى الاعالى .. الله العظيم الابدى ... على سبيل التحدى لو غمضت عينك وتأملت فى اللى بيحس بيه الهك العظيم ... مش من باب الهرطقة والبدعة ولا من باب الفضول او على سبيل الرفاهية ... لكن على سبيل الاحساس .. ارجوك خلى احساسك هو المتحكم فى قرايتك للفصل ده

الله متابع ومهتم بكم هائل جدا من البشر ... عارف ماضى وحاضر ومستقبل اكثر من ٩ مليار بنى ادم على الارض ... عارف نفر نفر ... متابع سيناريو حياة واحد واحد ... من اول حضرتك مرورا بريتشارد فى اوروبا و جاك فى امريكا وتشى يانج فى كوريا

ومارسيلو فى البرازيل ومارك فى استراليا ... كل انسان على الارض عارف الله حياته بتفاصيلها .. عارف اية اللى يسعده وعارف اية اللى بيجرحه ... عارف اية اللى بيحبه واية اللى بيكرهه ... عارف مشاكله وظروفه .. وعارف رفاهيته ومرحه ... عارف كل شئ ومدرك لاقل فسفوسة بيمر بيها فى احساسه وتفكيره ... مش هنا الصعوبة فى الاحساس .. لكن الجمل الجاية هى الاصعب فى الاحساس

الله العظيم الابدى والمهتم بتفاصيلنا والمدرك لحياتنا والراعى لكل المخلوقات فى ناس مش بتعبده !! ... ازاي الله القادر القوى يشوف ناس ملحدة مش بتعترف بيه وقادر يتحمل تفكيرهم وتحديهم لقوته !! ... ازاي يشوف ناس بتسجد للاوثان وتعبدوها ومش شايفاه وقادر يتحمل شركهم بيه !! ... ازاي يشوف ناس بتتحدى رسله وبتشتهمهم باسوأ الطرق بأسم الحرية وبتتحدى المؤمنين بيه وبرسله وهو صابر عليهم !! ... ازاي هو رحيم كدة !! ... ازاي هو قادر يسامح بالشكل دة ويصبر عليهم كدة !! ...

ازاي الله يشوف انسان تارك حياته للشهوة وللزنا والخطية والله خالق حياته لهدف اسمى !! ... ازاي الله يشوف انسان بيتحداه فى عبارات الانسان ما بياخدش باله منها زى تحدى قضاء الله وترتيبه وحكمته بجملة " ليه يارب " كأنه مدرك للتفاصيل زى الله !! ... ازاي يتحمل الله انسان ينسى يشكره على نعمه العديدة جدا من لحظة ما كان فكرة فى عقل الله لخلقه !! ... ازاي الله

يتحمل غضب الناس وكرههم لحياتهم ورغبتهم فى الموت وهو مانح الحياة كأنهم رافضين محبته!...ازاى الله يتحمل انسان غنى اعطاه الله المال ويبخل الشخص دة على اهل بيته وعلى الفقرا والمحتاجين!...

ازاى الله يتعامل مع تجاهلنا ليه بارتكاب الكم الهائل من الخطايا فى يومنا !... ازاى الله يتعامل مع الناس اللى مش بتصليله ومش بتكلمه مع انها المفروض مؤمنة بوجوده ؟... ازاى الله يتعامل مع الناس اللى خالقهم بنفسه ومطنشين ومنفضين لكل كلماته فى الكتب المقدسة !... ازاى الله قابل للتحدى الغير مقصود فى طريقة تعاملنا معاه وعنادنا معاه و مع نفسنا ومع اهداف وجودنا الحقيقية على الارض!...

دة مجرد تسخين للفصل الاصعب القادم ... افتراض غير مقصود منه زفاهية او ابداع قصصى او تأليف كتاب .. ارجوك يفضل الاحساس هو المتحكم فيك فى الفصل القادم



من بكرة فكرش ... ربنا مش هيقف ربنا ...

جت فى دماغك مليون فكرة ضدى ... او مليون كلمة عاوز
تخبطبنى بيها عشان الجملة دى ... حكمت عليا يا شيخ بتهمة
ازدراء الاديان وجايز الكنيسة تجتمع عشان تعمل عشانى مجمع
ويقولوا انى مهرطق وانى خارج عن الدين وانى كذا وانى كذا ...
مستعد وانا مش بلوم عقلى على الفكرة لكن بلوم قلبى ... الفكرة
خيال وفى النهاية ليك انك تحكم عليا باللى انتا عاوزه خصوصا لو
حضرتك انسان بار مش خاطى زى

قولنا متفكرش كتير وعشان مش عاوز اعثرك فى التفكير ...
اعتمد على احساسك اكثر ... نايم انا وفى امان الله .. واخذ بالك
انتا من جملة " فى امان الله دى " ... واذا حلمت ان صوت ربنا فى
المنام صحانى ..

- هوبياااا انتا بتتكلم جد

شروقه الروم

- سبق وقولتلك انها خيالية ... متفكرش كثير واستمتع بفرصة
لا حساسك انه ينطلق بدون جمود او حدود
- مينا ... اصحى يا مينا ... ضرورى اتكلم معاك
- طبعا انا كنت فى عز النوم ومن عادات الشعب المصرى انه
بيقوم من النوم عشان ينام تانى ... كان صعب جدا انى اقوم
من كسلى لكن قمت .. قمت لان كام مرة فى العمر ربنا بيكلمك
بالوضوح ده .. بس قمت وانا فى منتهى البرود ... كأنى مش
مستغرب او حاسس بالمفاجأة ... وكأنه عادى انى بكلمه ...
وكأنى عادى انى اسمع صوته ... وبوقى مفتوح شبرين وبتاوب
- خير يارب .. فى حاجة ؟
- كنت عاوز اقولك على حاجة هتحصل بكره اول ما تصحى من
النوم
- طب مكنش ينفع نأجلها لما اصحى يارب !!؟
- ضرورى تعرفها دلوقت
- خلاص منا كدة كدة صحيت .. اتفضل يارب قول اللى انتا
عاوزه
- انا النهاردة قررت ان بكره ميكونش فى ربنا .. من بكره مافيش
اله

شروقه الرود

- كلام عجيب وغريب ومش منطقي ومش مفهوم ... بنفس الايد
اللى كانت بتدعك عيني دعكت بيها ودانى عشان انا مكنتش
مستوعب اللى سمعته ... الواحد لسه صاحى من النوم وجايز
بيجيله تهيأوات وخيالات ... لكنه اعاد كلامه تانى
- من بكره مافيش اله
- يعنى انتا بتتكلم جد ولا اية ؟؟ ... يعنى من بكره مافيش
ربنا؟؟... طب استنى افكر كدة
- فكر
- دة انا كل يوم بصحى بالفطرة..كدة مين هيصحينى بالفطرة
بكره؟؟ مش انتا بتاع الفطرة واللى بتصحينى عشان ارواح
الشغل ولا اية؟؟
- اضبط المنبة على موبايلك وهو هيصحك
- طيب يارب مين هيطلع الشمس ومين هيطلع القمر طيب ؟؟
يعنى مين هيطبطننا نظام الكون ؟؟ ... منا يعنى مثلاً هروح
الشغل بليل وارجع بيتى الصبح ولا اية النظام ؟؟
- انا موصى الشمس تتطلع فى ميعادها والقمر يطلع فى توقيته
قبل ممشى
- اممم طيب انا المنبة هيصحينى والشمس هتطلع وهروح

الشغل ازاي انا هنزل من باب بيتنا ؟؟ ... منّا عارف اللي فيها
يعنى يارب وان فى كلاب فى الشارع وانا بصراحة بخاف منهم
.. كل واحد وليه ضعفاته بقى يارب ... وكنت كل مرة بقولك
عديها على خير يارب والكلاب مبتعملش حاجة ... دلوقتي
بقى مين اللي هيخلي الكلاب متعملش حاجة !!؟

- متقلقش انا موسى عليك

- طيب يارب الكلاب وساكتة .. والمنبة وهيصحيني .. والشمس
وهتطلع والدنيا تمام ... انتا عارف بقى اللي فيها اكثر ...
مديرى مطلع عين اهل " .. " اة معلش معلش هشتّم وانتا موجود
برضة ميصحش .. مديرى دة مين هيتصرف معاه غيرك ؟؟
طب موته قبل ما تنفذ قرارك دة يارب او خليه يحبني ... لا لا
مينفعش يارب تمشي ازاي ... خد عندك يارب دى كمان ...
انتا عارف انى بحب شريهان من زمان واحنا بنحب بعض من
فترة طويلة ودلوقت بقى مين هيظبط امور الجواز معاها
غيرك ؟؟ يعنى انتا عارف بيتها صعب شويتين .. شويتين ثلاثة
الصراحة .. وانتا رب قلوب ... وعارف انى بحبها مين
اللى هيسلك الامور دى ؟؟ ... والواد اخويا بتاع الثانوية العامة
انا عاوزه يخش هندسة .. مين اللي هيدخله كليته ولا مين اللي
هيساعده فى مذاكرته ؟؟ ... وامى المريضة مين اللي هياخد

شروقه الروح

باله منها طيب منتا عارف انى مشغول فى الشغل وفى اخويا
وفى الفلوس وفى شريهان .. مين هتكل عليه فى الحكاية دى
؟؟ ... وفلوس المشروع مين اللى .. والمشكلة اللى مع فريد
صاحبى ... والفلوس اللى عليا ل... وجارنا اللى فوقنا اللى
متخافق معاه وهو ناوى

- وانا بحكى لقيت صوت العتاب مسموع فى انفاس الله وهو
بيسمعنى

- قالى : انتا ليه مقولتش يارب لما تمشى مين اللى هحبه بعد
كدة !!؟

- ليه مقولتش مين اللى هصليله واكلمه بعد كدة ؟؟ ليه مقولتش
مين هيفتحلى بيته " جامع او كنيسة " طول الوقت بعد كدة ؟؟
ليه اللى بينا هو مجرد طلبات واحتياجات منك وانا بديك
احتياجات اكبر حتى من اللى بتطلبه ... تفكر انا ناقصنى
حاجة ؟ ... انا الكامل وليا ملائكة تسبحنى .. لو عاوز اخلق
مؤمنين من حجر يعبدونى ويحبونى فانا قادر على دة ... لو
كان الموضوع ما بينا هو توفير احتياجات فانتا مش بتعبد اله
لكن بتعبد مصباح علاء الدين .. يبقى انتا عايش من غير حب
حقيقى ومن غير عبادة حقيقية لالهك

- انا اسف على رواية الفصل بالشكل ده واسف لو حصلت عثرة
فى تفكيرك بسببى لكن الاله عندى انى حركت احساسك
بهدف ... هدف الاحساس بانك بتعيش ايام من حياتك بدون
اله لانك ببساطة مش بتحبه فعلا ولا بتعبده عبادة حقيقية لكن
بشكل تقليدى وروتينى وبدليل انك بتشتتم وتتحلف وبتكذب
وبتلعن وبتقتل وبتسرق وانتا مواظب على صلاة الجمعة فى
الجامع أو قداس الاحد فى الكنيسة ومواظب على ممارسات
الغلط والخطية بنفس الانتظام وعندك ربنا هو طلبات
واحياجات يحققها لك وقت ما تعوز مش اكتر ... اتمنى تكون
الفكرة وصلت

اغبى رجل فى العالم ...

ولانى يحلم كثير .. للمرة الثانية يجى واحد ليا فى عزم النوم
عشان يخلينى احلم فى قلب الحلم
قالى تعالى هعرفك على شخصية مهمة جدا جدا....
قلته اية يا عمنا هو دة وقته انا نايم...
قالى تعالى هتندم لو متعرفتش عليه....
يعنى هى حيكث وانا نايم بقولها وانا اقعد ادكع فى عينى....
استسلمت وانا مش عارف لية...قولته وهنتعرف على مين
انشالله؟؟؟؟.

قالى هعرفك على اغبى واحد فى العالم....

نعممممممممممممممممم

مصحينى من عز النوم عشان اغبى واحد فى العالم
كمان...يانهارك ملون...سيبنى سيبنى انا عاوز اناام خلينى كدة

فى عز النوم بلاش دوشة وتقومنى ونحلم والكلام دة....

قالى احلم ومش هتتدم....

قولتله عاوز اناام...

قالى احلم ومش هتتدم....

قولتله عاوز اناام....

قالى احلم ومش هتتدم....

فحلمت



روحنا المطار ودى كانت البداية....مطار مليون على اخره...بشر
من كل نوع ومن كل لون ومن كل جنس مليون بالانس...نظام المطار
كان زى نظام المطاعم.....على باب المطار فى واحد من العاملين
بيسلمك ورقة بتفاصيل الرحلات اللى طالعة وكأنها المنيو بتاع
الاكل...

قولت للى معايا : اية من اولها شكل الموضوع عجيب...

بصيت فى المنيو قصدى يعنى الجدول اللى ادهولى اخينا اللى ع
الباب...ضحكت ضحك لما شوفت الرحلات اللى طالعة...كانوا
رحلتين مفيش غيرهم...لا لا استنى دة الاعجب والاغرب ...
التفاصيل المكتوبة على الرحلتين المتوافرين فى المطار...اقرا
واستعجب معايا...

شروقه الروم

الحاجات المشتركة فى الرحلتين..... مدة الرحلة والفيزا اللى
هتاخذها عشان تعيش هناك ... فيزا ابدية بالجنسية.... بس المدة
بقى اكتر غرابة..... المدة بتختلف على حسب الراكب فى اللى
بيقضيها سنين وفيها اللى يقضيها شهور..... وعشان كدة صحيح
هما رحلتين بس لكن الطايرات فى المطار شغالة كلها على الخطين
دول....المطار زحمة جدا بس هما كاتبين متقلقش دايما فى اماكن
فى اخر الورقة اللى فيها الجدول....
استنى لما اكملك....



الرحلة الاولى هتروح لاجمل مكان ممكن تشوفه العين ويتخيله
العقل لكن...زى ما بيقولوا الحلو مايكملش...الطايرة اللى هتروح
المكان دة مش مريحة مش متوافر فيها وسائل الترفيه من الاخر
شاب روش زى ممكن يعتبرها مملة..مملة؟؟ دة خنيقة جدا
جدا....بس ميزتها الوحيدة المكان اللى هتروحه.....اجمل مكان...
الرحلة الثانية....هتروح لاسوأ مكان ممكن تشوفه العين ويتخيله
العقل لكن...زى ما بيقولوا الوحش مايكملش...الطايرة اللى هتروح
المكان فى منتهى الرفاهية ممكن تعمل فى الطايرة اللى انتا عاوزه
حتى ممكن تخلص رحلتك بدرى بدرى ازاى مفهمتش بس بعدين
فهمت...وانا اخلص رحلتى لية دة انا مسافر فى ارووع طايرة وممكن
اعمل اللى انا عاوزه بس المشكلة...المشكلة انى هروح اسوأ

مكان....

بصلى الراجل اللى معايا وقالى اية رأيك؟؟...تتطلع لاحلى مكان
باسوا طاييرة؟؟...ولا تتطلع اسوا مكان باحلى طاييرة؟؟....قالى قبل
متقرر تعالى بص على المنظر دة...

شبابيك التذاكر

يانهار اسود على الزحمة....كل دول على رحلة اسوأ مكان..الناس
كلها طوايير طوايير طوايير...والناحية الثانية تقريبا
بتتش...والطيارين فى رحلة اسوأ مكان مبسوطين ما الاقبال
تاريخى..والطيارين فى رحلة احلى مكان زعلانين....ينادوا هنا بكل
ما فى وسعهم دة احلى مكان تعالى احجزوا....والتانين هنا احلى
طاييرة تعالوا اركبوا...

بعدها خدنى اللى جالى فى الحلم وقالى تفتكر انتا مش تبقى
اغبى واحد لو اخترت اسوا مكان تعيش فيه للابد عشان طاييرة
مؤقتة؟؟...وفى الاخر قالى انا جبتلك تمن التذكرة وادى الفلوس
فى ايدك اختار وكان لازم اصحيك عارف لية....اخدنى وورانى
اخر مشهد فى الحلم....انا اول واحد قدام شباك تذاكر اسوأ
مكان.....

العالم الافتراضى ...

العقلاء فقط هم من لديهم عالم افتراضى

موازى للواقع يحلموا فيه كيفما ارادوا.....

هادى الطباع مجنون احيانا وعاقل اغلب الوقت .. وقد نختلف
فى النسبة ما بينهم لو كنت تعرفنى .. ولكن اية هى حدود معرفتك
بيا ١٩ ... إلى اى مدى انتا مدرك لكل خلية تفكير فى عقلى ولكل
خلية مشاعر فى قلبى ١٩ .. بالتالى حكمك عليا مهما كانت درجة
قربك ليا غير كافية لمعرفة الحقيقة الكاملة .. لكن مش دة السبب
الرئيسى فى عدم ادراكك الكامل ... خلىنى اعرفك على العالم
الافتراضى الخاص بيا الموازى للواقع

السما عبارة عن اقواس قزح متداخلة فى بعضها والسحاب

فراشات ضخمة ولكن مش مخيفة ابدا لان الوانها المبهجة مع الوان
السما مريح للقلوب المرهقة من كل شئ صعب وكأنها بتمتص
الحزن فى القلوب وتعبى اماكنهم باحلام جديدة ... مافيش شمس
وقمر لانى مش محتاجهم بس مش معنى كدة ان الكوكب مظلم ...
بالعكس الكوكب طول الوقت منور عشان النور الحقيقى بيخرج من
شفافىف البنى آدمين اللى على الكوكب وما اكثرهم .. كل الوشوش
بتضحك ومافيش وش مكرمش من الزعل ولا تلاقى فى اى وش
تجاعيد ولا حتى فى قلوبهم وعيونهم المبسوطة بتزود البهجة فى
المكان والنور عمره ما بيغيب وكأن الحزن مرفوض ... وكأن العتمة
غاز ضار مطرود من المجال الجوى ..

الارض فى العالم الافتراضى بساتين ورود من اندر واجمل الانواع
... ومافيش فى الارض شوك يجرحنا وبتجرى ارواحنا فى الارض
بدون خوف ... اللى بيطيروا دول من بعيد مش عصافير دول على
فكرة بشر ... احنا مش محتاجين لمواصلات عشان الكل هنا
بيعرف يطير .. الكل هنا بيضحك وبيطير .. الكل هنا بيقدر يلمس
السما وينط من فراشة للتانية اقصد يعنى من سحابة للتانية ...

الالوان هنا كلها فاتحة محدش بيلبس الوان غامقة ... مثلا
مافيش هنا لون رمادى ولا انك تكون عايش متعلق ما بين الاستمتاع
والاستسلام لانك هنا هتلاقى حلمك الشئ السهل الرايق البسيط

الى بيحى زى ما فى خيالك بالظبط .. مافيش هنا لون اسود
عشان اصلا محدش شافه قبل كدة لان الليل عمره ما زارنا ولان
كل الفرع فى كل مكان ومحدش بيحب العتمة ..

هنا مافيش عواجيز اصلا العجوز مش بشعره الابيض لكن
العجوز هو الشخص الذى شاب قلبه مهما كان عمره .. وهنا القلوب
شباب على طول وكلها امل فى يكره .. وهنا الكلمة الطيبة والدعوة
الصادقة بترن فى ودانك من كل الى حواليك محدش بيخبي
احساسه ومحدش بيقلل اهتمامه ومحدش بيفكر يجرح حد
بالعكس بنخاف على بعض وبنحب بعض بدون اى شوايب لان الكل
هنا مثالى

هنا مش محتاج تعافر عشان بس تلاقى فرصة ولو على سبيل
الصدفة ... هنا بتلاقى الفرص جاهزة والتشجيع موجود والمكافاة
مستتيك عند خط النهاية وبتنادى عليك باسمك وكأنها عارفة
مشهد النهاية السعيد ... هنا البنت التى بتحبها بتحبك وهنا الولد
الذى بتحبيه بيتقدملك من غير قلق من مارء الظروف ومن مارء
تغيير المشاعر ومن مارء رفض الاحساس ... هنا لو حتى لم يكن
زمن الحب فالزمن فى العالم الافتراضى يتغير عشان يخلى الحب
ممكناً

شبعنا من المثالية ؟ .. اضايقت من عدم واقعية المشاهد ؟ ..

شروقه الرود

مختلف معايا فى العالم الافتراضى الخاص بيا ١٩ .. عندك حق ..
العالم الافتراضى هو خيال شخص الى حد كبير وحتى مسمى "
موازى للواقع " مناسب لدرجة ما لانه عمره ما هيتقابل مع الواقع
فى نقطة مشتركة بعلم الرياضيات اللى كلنا درسناه ... لكن ..

وجود العالم الافتراضى ضرورة للهروب من الواقع لان الهروب
فى بعض الاوقات شفاء للارواح والقلوب المرهقة ... وجود العالم
الافتراضى وسيلة لاكتساب قوة وشجاعة داخلية لانك تحلم من
جديد بكل امل وتحاول اكثر فى واقعك وجود العالم
الافتراضى مخرج لاحساسيس منقوشة فى جدران قلبك لاضهار
رغبة مكبوتة من ضغوط العالم فى اكتشاف حقيقة ومعنى التواجد

المثالى مع الله





يوم الاثنين كلمة ابيحة ...

عند المصريين تفضل كلمة الشغل كلمة ابيحة ويشعر مع الكلمة بكل طاقات المشاعر السلبية جواه .. ولانى مصرى من ضمن المصريين اصحاب هذا الفكر كان يوم الاثنين وهو من اطول ايام العمل فى الاسبوع بالنسبة ليا عبارة عن " كلمة ابيحة "

انا بشتغل فى وحدة صحية فى الريف ... الشغل فى الريف ممتع وغريب....اصناف مختلفة من البشر بتعامل معاها....حتى فى الوحدة الصحية نفسها...بتعامل مع المتمددين والمتدين والفلاح والمنقبة والاخوانى والسلفى والصايغ والفقير والعاذى ومش بأسلوب طيارى لكن بعمق كأنهم معرفة وعشرة سنين...بتبسط اكيد من نفسى كل ما بسمع منهم كلمات الاعجاب بيا ...

مدير المكان دكتور عطية من انقى الاشخاص اللى قابلتهم .. مش محتاج مجهود كثير لانك تفهمه لانه من الناس اللى لسه متعرفش معنى التلوين مع المنصب بالعكس فضل زى ماهو اللى على لسانه خارج مباشرة من قلبه

ابلة منى المنقبة " رئيس التمريض " هى اكثر منقبة متمدينة شوفتها فى حياتى ... كفاية انها انتخب شفيق ومرشحتش مرسى

شروق الروم

... تتميز ببساطتها وضحكتها واسلوبها المتعمد لرفع معنويات اللى قدامها ... كفاية لما قالتلى فى يوم ان الممرضات بيتنافسوا على المبطشية معايا ادتنى احساس انى " مهند " بتحفل بالفالنتين وكان من الممكن تحفل بالهالويين لو عندها وقت لدة طقم التمريض كله يتميز بالبساطة المنتهية والجو الاسرى ما بينهم .. حاجة مدهشة .. اظن لو مجتمعنا كان متعاون مع بعضه زى ما طقم التمريض دة متعاون كنا وصلنا لمرتبة الدول المتقدمة السلفى استاذ عبد الحليم استاذ التحاليل هو أمام الوحدة و برغم اقتناعى الكامل بانى فى نظره كافر لكن يعجبنى صراحته وفى انه مش بتفارق الابتسامة فى التعامل معايا الغلبان اكرم العامل اللى بيتكلم فى تسع مواضيع فى وقت واحد معايا وبحاول انى افهم منه كل موضوع لوحده...لكن بفشل....ومع فشلى اتبرعت بودن تسمعه على طول وبدون رد وبدون مقاطعة واظن انه يلاقى حد يسمعه دة بيريجه...

استاذ احمد واستاذ مصطفى الاداريين " بتوع الغياب " الالفاظ والشتيمة والسيجارة مش بتفارقهم ومع احترامهم ليا فى التعامل لكن انا مقتنع انهم لو اتسالوا عن رأيهم فىا هيقولوا : ابن الكلب دة بنحترمه وبنحبه

محمود رجل الفذبة ... فى يوم من الايام قبل ما ارواح من الوحدة عرض عليا "محمود" ممرض الطوارئ انه يوصلنى... مقدرتش ارفض... محمود راجل مكافح... ملامحه المصرية بتدل

على حبه لبلده برغم انه بيشتغل فى شغلين شغال فى الوحدة وبليل فى مصنع ولحد الساعة ١١ لكن بيحب الحياة وبيحب بلده...راضى وعلى وشه ابتسامة الحياة... اتعلمت من " محمود " حكم كثير وبرغم سنه الصغير " ٢٩ سنة " لكن عنده حكمة العواجز بجانب نشاط الشباب...مبسوط انه بيتشغل بدل الشغلانة اتين وبدل ما بيته مرتاح وبيناموا شعبانين بيقى ليه الشكوى من الدنيا ١١٩...اهم حاجة تفضل الصحة موجودة والولاد يبقوا بخير...قناعة رهيبة.. وانا مقدرتش ارفض عرضه...ركبت " الفذبة " لأول مرة فى حياتى.. غيرى كان ممكن يفكر ازاى دكتور يركب فذبة والشكل العام والكلام الاونطة دة...التجربة لا يمكن رفضها.. الفذبة مسلية ومحمود كان حبيب الموضوع وسابق باقصى سرعة.. انا " الفذبة " كانت جزيرة بالنسبة ليا والبحر من كل ناحية بيدى هوا منعش فى كل حنة فى جسمى...انا برغم انى فطست من الضحك وانا راكبها لانى افكرت مشهد احمد حلمى ومنة شلبى فى فيلم اسف على الازعاج لما كانوا راكبين الموتسيكل وبعيدا عن انها فذبة وبعيدا ان السيناريو ما بين حلمى ومنة والمشهد رومانسى لكن فعلا انا كنت طائر...طاير وبضحك.. ومستمتع وبنهج.. بنهج من الفرحة.. احساس ممتع.. انا اول مرة احس انى رجعت طفل كدة يومها عموما شويقى سعد مش كلمة ابيحة لكن الشغل فى شويقى زى اى وحدة صحية هو الكلمة الابيحة.. لان الوحدة الصحية هى جمعية خيرية تعاونية من اجل صرف الدوا للعيان عن طريق ورق حكومى

اسمه التذكرة وبسعر رمزى...دة ملخص الشغل فى الوحدة.
لكن الريف ممتع...بحس فيه بانى "ملك"...انقى هوا ممكن
تحسه...فرق شاسع بين هوا عادى يريح جسده عن هوا يدخل
قلبك ينعشه.. التمشية المعتادة لمدة عشر دقائق وسط الارض
الزراعية فى بداية اى يوم عمل ومع انها مجرد تربة لكن سما...نوع
جديد من انواع السعادة كان نفسى اجره وقد كان.. فى خلال التمشية
دايما بمر على شجرة عتيقة وصامدة من عشرات السنين فى كل نظرة
منى للشجرة بشوف كتاب التاريخ مفتوح قدام عيونى باصدق ضحكة..
بحس اى مصر مختلفة وباصالة مصر فى كل مرة امر فيها بالمكان
دة.. فى رأى الشجرة هى اروع مؤرخ لعراقة مصر
لما روحت فى يوم من ايام الاتنين الايحة كنت هلكان وقررت اركب
توك توك بدل التمشية...القراردة غير مجرى حياتى..بهزر
طبعا..بس سواق التوك توك قالى سر تسمية المكان ب "شويقى سعد"
قالى ان "شوقى سعد" هو رجل اعمال كان سافر برة وبالتحديد
"كوبا" ورجع وكان المنطقة ارض فاضية وهو بقى اللى اسس
العزب الموجودة دى بفلوسه ولانه لما رجع كان لسانه اتعوج من اللغة
الكوبية "زى ما قالى سواق التوك توك" احتراماً وتقديراً لمجهوداته
جنباً الى جنب للتريفة على عوجة لسانه بقى اسم المكان "شويقى
سعد"...حقيقى حسيت انى هبقى ساذج لو صدقتها...بس صدقتها
مش هقدر اكتب تانى عن يوم الاتنين لانه كلمة ايحة...ومش
بحب اقول كلام ايح كثير "الى حد ما يعنى"...هكتفى بكدة

فن الاستهبال

فى حكم الحب كلنا خارجين عن القانون .. افعالنا غير
قابله للسيطرة برغم اننا بنحاول كتير نكون فى كامل
قوانا العقلية لكن بنفشل .. ودى الحالة الوحيدة اللى
بيكون فيها الفشل حاجة حلوة .. الحالة اللى لما بتفقد
فيها سيطرتك على نفسك ويبقى عقلك وقلبك ، تفكيرك
وافعالك من كوكبين مختلفين ... لما تبدأ فى دخول عالم
الحب بتكون خارج عن القوانين الطبيعية والمعتادة فى
تصرفاتك وسلوكك .. لكن يفضل الاغرب فى الحب هو
"فن الاستعباط"

الاستعباط اللى بيكون قبل كلمة " بحبك " حالة جميلة .. مافيش اتتين عاشوا قصة حب معدوش على مرحلة الاستعباط .. " هو " بيعاملها بمنتهى الاهتمام وكأنها ملكة متوجة غير قابلة للنزول من عرش افكاره لكنه راهب فى النطق .. صحيح الافعال اهم من الكلام لكن الا الكلمة دى .. " بحبك " كان لازم يقولها لكن خوفه بيدفعه لحالة الاستعباط .. اما " هى " فى حاجات بيقولها مافيش حد بيضحك عليها الا هى .. وشايفة اقل تفاصيله حالة من الجمال .. مش بترغى مع حد قد ما بترغى معاه ومش بترخم على حد زى ما بترخم عليه .. اصل زمان كان من علامات الحب " النظرة مع الابتسامة " دلوقتى الزمن اتغير وبقي من علامات الحب " الرغى مع الرخامة " .. مفروض كان يفهم اعجابها بيه وانها عاوزة تعيش فى العالم الخاص بيه اكثر ... بس " هو " مصر على خوفه فقررت الاتجاه "هى " كمان لحالة الاستعباط

الاستعباط هو الراعى الرسمى للزغزغة فى الحب .. النظرات الخفية اللى بتكون من وسط الناس زى السهام فى القلب .. عارفين ان عيونهم رايحة لبعض وسط الزحمة لان الحقيقة ان قلوبهم عايشة فى فضا واسع مافيش فيه غيرهم وحلم حبهم .. لكن بمجرد تلاقى النظرات بتهرب العيون فرحانة بالصدفة المقصودة اللى كانت كلها استعباط ... ساعتها بيعسوا برعشة فى قلوبهم

اشبهه بزلزال لكنه زلزال اذكى من انه يبان تأثيره المادى لكن لو ارواحهم بتتكلم كانت حكمت عن زلزال الاحساس وعن الزغزغة اللى ضحكت قلوبهم

الاستعباط هو الراعى الرسمى للحواديت العجيبة .. الحواديت اللى بتظهر فجأة تستحق براءة اختراع فى بعض الاحيان .. مع ان والدته بتطبخ اكل فى الدنيا لكن عمره ما اتكلم معاها فى الاكل وتعبها فى المطبخ .. لكن مع المتسعبطة "هو" مهتم جدا بنجاحها "هى" فى تحضير السلطة ... و مع ان "هى" عمرها ما سألت والدها عن طبيعة شغله والمجهود اللى يبذله عشان يجيب فلوس ليهم ويصرف على البيت لكن "هى" منبهرة بنجاحه "هو" المستعبط فى شغله وبتسأله على اقل التفاصيل .. مش بيزهقوا من الكلام مع بعض حتى لو الكلام ملوش لزمة بداية من السياسة لحد الالعب على الفيس بوك لان الكلام له لزمة فى قلوبهم ... اصل فى ناس كدة ممكن تعقد معاهم كل دقيقة من حياتك ومش هتزهق ... لان وجودهم بالنسبة ليك حالة فرح

الاستعباط هو الراعى الرسمى للزهايمر الماكر .. انتا ازاي فاكتر الموقف دة لحد دلوقت ١٩٩٩! " وهى مش ناسية الموقف بالعكس كانت بتسرح فى وسط الناس لثوانى فى نفس اليوم عشان يزور قلبها الموقف ويرجع بابتسامة بريئة بالذكرى الجديدة الجميلة اللى

اتضافت النهاردة لحياتها .. " انا مش فاكتر خالص انه كان عجبك
منى التصرف دة ساعتها بجد التصرف كان صح ١١٩٩ " وهى يوم ما
قالت الكلام الحلو دة عنه راح كتبه فى يومياته ونام يومها وهو
مبسوط وفخور بنفسه وحس انه عندها فى مكانة " ادهم صبرى "
رجل المخابرات الاول فى سلسلة الرجل المستحيل .. لكن الكلام
الحلو اللى سبق وقالوه عاوزين يسمعوه بدل المرة عشر مرات كأنها
كلمات اغنية حلوة ... زهايمر الاستعباط صحيح ساعات بسبب
حالة من الحيرة والغموض خوفا من انه يكون زهايمر حقيقى لكن
مع قوة الحب بيظهر الاهتمام فى " التفاصيل الصغيرة " اللى الى
حد ما بيريج وبيقلل الخوف

الاستعباط هو الراعى الرسمى للطاقة الحركية للقلب .. لما
بيكونوا فى مكان واحد كل واحد فيهم بيبدل مجهود حركى من قلبه
اكثر من المعتاد عشان الجاذبية الروحية ما بينهم تفضل فى حالة
الطاقة الفعالة .. " هو " هدفه بيان فارس الاحلام فى عيونها
ويتشقلب عشان يعجبها و " هى " هدفها تفضل ال " سندريلا " فى
عيونه ... جزء من تصرفاتهم بتبقى ترجمة للاهداف دى حتى لو
حاولوا يخفوا حقيقة الاهداف لكن لان الحب جماله فى
البساطة والعفوية مش معنى كدة ان التصرفات بتبقى ممنهجة
ومنظمة لكن الاستعباط بيدفعهم للسيطرة على العفوية بشكل او

شروق الروم

باخر وفى نفس الوقت بيدوا فرصة للطاقة الحركية للقلب تطلع
لاستمرار الجاذبية .. من الاخر كدة اللى بتحبه بيخليك مصدر قوة
قصاد الكل وقصاد الدنيا ماعدا قدامه هوا هيفضل نقطة ضعفك
بيقولها على فكرة انتى اقصر منى ويبستفزها عشان تقف جنبه
ويقارنوا الطول ببعض لكن الحقيقة بالنسبة له " هو " يقرب حلمه
بانها تكون جنبه زى ما كان متخيلها بفستان فرح .. " هى "
الشخصية اللى بتغير عليه من اقل كلمة حلوة بتسمعها من بنت
تانية عليه وبستفزه وبتغمز له وتقوله " الله يسهلوا " و"هى" من
جواها نفسها تسمع منه وهو بيقولها " على فكرة انا وفلانة
اخوات".

"هو" بيستهبل لما يبعد شوية ويعمل تقيل لانه عاوزها تهتم اكثر
وتسأل الاول وتدور عليه ... و " هى " بتستهبل لما بتعمل زعلانة
لانها عاوزة انه يدلها اكثر ويقولها كلام حلو يصالحها بيه ..
بيزودوا فى جملهم " عشان خاطرى " ويستنوا تأثيرها .. " وانا
روحت فين ؟! " هى الامان فى وقت الاحتياج .. " احكىلى " هى
الدفا فى عز البرد .. بيكتبوا جوابات فى عيونهم ومستنين قرايتها
لان فى الغالب اللى بنحبهم مش بنعرف نقولهم اغلب الكلام اللى
كنا فعلا عاوزين نقوله ونطلب من عيوننا تفضحنا
مافيش قصة حب حلوة من غير مرحلة استعباط



السحر

برغم ديونها وفقر جيوبها وعنادها معايا ...

لما بصادفك بشكرها

فى اوقات فى حياتنا الغيوم بتتراكم على المشهد وتظهر الدنيا
قدامنا بشكل ضبابى وبتختفى الاحلام ورا التراكمات اللى
بتحصل .. الغيوم دى بتكون ضغوط وبتكون مشاكل وبتكون علاقات
متشابكة ... بنحس بحجر ثقيل على قلوبنا وكأن الغيوم هدفها ان
قلوبنا تغرق فى بحور العتمة ... بتحس بان انفاسك بتخرج منك
بتصرخ بتطلب النجدة عشان هوا منعش يدخل جواك ينقذ باقى ما
فيك من حياة

احنا فى وقتها بنبقى شايفين احتياجنا لبطل خارق يقدر يتشل
بقايا الحياة والاحلام اللى فينا ويرجعنا تانى نعيش ... الافلام

الى دائما بتتكلم عن الابطال الخارقين بتكون افلامنا المفضلة ...
برغم اننا كنا فاكيرين ان حبنا للافلام دى يتعلق باحلام الطفولة
المجنونة زى رغبتنا فى اننا نطير مثلا ... لكن بنكتشف بان حبنا
للافلام دى بيستمر مع الزمن وبيتعلق اكتر برغبة داخلية كامنة
جوانا فى رغبتنا فى البطل الخارق اللى يخلينا نعيش بامان بدون
خوف بدون عتمة تقدر تغلبنا

بس الحقيقة المناسبة البعيدة عن قدرات البطل الخارق هو
الاحتياج للاهتمام .. احنا بس بنبقى محتاجين اهتمام من حد
بنحبه ويحبنا .. ويكون اهتمام صادق ... تكون بس اذان مصغية
مستعدة تسمعنا فى وقت الفضفضة حتى لو مش عندها حلول
كفاية انها تساعدنا بس عندهم براح كفاية انهم يشيلوا همومنا
معانا ... ساعتها فى وسط الغيوم والعتمة يظهر نور الامل فى ان
لسه فى بكره جاى وجايز يكون بشكل تانى وبروح تانية وبالوان
تانية

العجيب فى قصتى انى مختلف فى البطل الخارق الخاص بيا ...
هى لا تقدم اى شئ ظاهر .. هى لا تقدم اى اهتمام مادى ...
شخص بعيد جدا عن المشاهد الحياتية اليومية لكنها حاضرة فى
كل لحظة من لحظات اليوم ... هى ببساطة شخص لا يملك سوى

كل شئ ... دة انسب تعريف لقدرتها

كل حاجة ناقصة حاجة وهى مش موجودة جنبى لكن تفضل هى
السبب فى كل حاجة حلوة عايشة فيا لحد دلوقت .. من مجرد
قرايتك للكلام تحس بانى عايش فى قصة حب لكن اننا ابعد ما
يكون عن قصة حب

هى اللى فككت حصار قلبى من الغيوم ... هى اللى قومت احلامى
من تابوت العتمة ... انقذت فيا روح الحياة .. حولت صراخ
الانفاس لاصوات مزيكا فى سما جديدة كلها امل وتفاؤل ...
مبقاش فى حجر ثقيل على قلبى بالعكس قلبى بقى قادر يطير ...

بس ازاي دة حصل وهى مش بتهتم ١٩ .. وازاي باقل كلام يخرج
منها يغيرنى للافضل ١٩ ... وازاي بمجرد نظرات مع ابتسامات
بريئة يتغير السيناريو لمشاهد ممتعة من الحياة البسيطة ١٩ ...
منين جابت الالوان للصورة اللى كانت ابيض واسود بس ١٩ .. ازاي
هى رسمت قوس القزح وسط الغيوم ١٩٩

هى ورا الستارة لكن ... هى الملحن لكل فكرة حلوة بتظهر على
المسرح ... هى الصوت لكل كلمة حلوة بتخرج منى وبتعجب
السامعين ... هى الشمس وانا مجرد بعكس نورها فاطهر

للمشاهدين كأنى القديس ... ازأى يكون شخص مساحة دوره
اصغر من مساحة دور كومبارس وياخذ هو البطولة ؟
عارفة لما بيسألونى عن احوالى فى الدنيا بقول اية ٩٩
برغم ديونها وفقر جيوبها وعنادها معايا ...
لما بصادفك بشكرها



هو ليه الحب مفندوش فى المدرسة ؟

انا فاهم ان الحب غريزة جوانا موجودة ... طب ما الفكر فى
عقولنا غريزة وجوانا موجود ليه بقى بندرس عقولنا مواد
تنشطها وقلوبنا مش بندرسها مواد حب تفهمها !!؟؟

مع انه اصعب من الكيميا ومن الهندسة ... ولغزه صعب
ومبيتفهمش واعقد من الفلسفة .. والفشل فيه بيخرج قلوب ..
ولجرح القلوب مافيش دوا ... طب مش كان الاولى ندرس الحب
فى المدرسة حفاظا على القلوب !؟

ومع اننا خدنا ان واحد زائد واحد يساوى اتنين لكن فى الحب
مفروض نكسر تعليمنا ويبقى الواحد زائد الواحد يفضل واحد ...
طب ازاي .. ازاي هنعرف نكسر قاعدة رياضية حافظينها صم من
واحنا فى كى جى وان ومحدث ادانا جنب حصة الحساب حصة
حب !!؟

فى رجل دين جاوبنى وقالى ان الاجابة بان الله محبة واننا لو

عرفنا الله هنعرف نحب ... الاجابة كانت فى بدايتها مريحة
للسؤال الصعب واتقدمت خطوة فى سكة انى الاقى مبرر لاننا
مناخدش الحب فى المدرسة ... لاننا كدة بناخده فى حصص الدين
... بس توهت لما دخل فى عقلى اسئلة اصعب .. طب البوذى
ميعرفش يحب !!؟؟ .. يعنى مافيش قصص حب فى الصين واليابان
والهند !!؟؟ ... يبقى ليه ربطنا الحب بمفهوم الدين ومش بمفهوم
الانسانية مدام العالم اللى متعرفش ربنا عرفت الحب !!؟؟

ليه فى ناس تقسى على مشاعرها ؟؟ ... ليه فى ناس بتكتم
احساسها ؟؟ ... ليه فى ناس سجنها مش سجان وزنانة وباب
مقفول لكن سجنها انها تعشق من غير ما تقول ؟؟ ... ليه فى ناس
مشاعرها مداس من كلام الناس ؟؟ ... وليه فى ناس مشاعرها
تتاخذ هزار فى عيون الناس وبدون تقدير واحترام ؟؟ ... ليه فى
ناس مجروحة بتاخذ من الحب وسيلة تار وانتقام ؟؟ ... وليه فى
ناس تحب الحب ووقت الجد متاخدش قرار ويتحرق الحب فى
مشاعر الشوق والنار ؟؟ ... ليه فى ناس الحب بالنسبة لها مجرد
لعبة وشغل لوقت فراغ ؟؟ ... ليه بنتعامل مع اسمى احساس جوانا
بالشكل البشع دة ؟؟ ... مدام احنا كدة مش كان الاولى ناخذ الحب
فى المدرسة !!؟؟

عشان كدة مش يستغرب ان تشويهنا للحب يوصل بينا لاعتباره
حاليا جريمة فى حق المجتمع ... تخيلوا ان اسمى احساس فى

شروقه الروح

قلوبنا مش بنعتبره فضيلة لكن بنشوفه جريمة !! ... وكلمة الحب فى بعض العقول بتبقى كلمة خادشة للحياء ومن يمارس الاحساس دة كأنه يمارس الرذيلة !! ... لكن العيب مش على الحب لكن العيب فى تعاملنا معاه والعيب فى اللى وصلنا ليه من استخدام مشاعرنا واحاسيسنا بشكل سئ اهان انسانيتنا واهانتنا

بس انا قررت ادى اول درس فى مدرسة الحب ... اعرفكم على الحب

من اولها كدة ... مافيش قانون فى الحب .. مافيش سبب فى الحب

الحب هو جسر الامان للحياة لما تبقى الناس خايفة من عالمها ... الحب هو طوق النجاة لما الناس تبقى غرقانة فى همومها ... الحب هو التوب اللى بنبلسه لما نحس بالعري وباننا من غير حياة .. الحب هو الحلم اللى بنقابله لما بنشوف الببان مقفولة واليأس محاطونا ... الحب هو شهية الحياة لما نفقد اللذة فى دنيتنا

الحب ميعرفش معنى نهاية ولو حتى حكمنا بان فى نهايات سعيدة لان مشاعر الحب فوق الزمن .. الحب هو الضحكة اللى بتصحى من النوم عشان تحضن الدنيا .. الحب هو لمسة الدفا السحرية فى حكايات عمرنا لما نحس ببرودة يومياتنا .. الحب هو انك تلمس السما وانتا واقف على الارض ..

الحب هو احساس الروح بالزغزغة لما تشوف حبيبك قدام عينيك

.. الحب هو الغنا اللى بيطلع من قلبك كرد لما تسمع كلمة " بحبك "
من اللى بتحبه ... الحب هو السحر اللى بتفضل تحت تأثيره للابد
وبدون شروط وبدون قيود وبدون حدود .. الحب هو احساس
الحرية والسعادة اللى بيجرى فى دمك فى كل انحاء جسمك لما
تحضن حبيبك ... الحب هو لمسة الشفا من جروح الدنيا فيك فى
لحظة ما تلمس ايد حبيبك ... الحب حقيقة مش اوهام ولا خداع
ولا زيف ولا انتقام ولا ظروف ولا وقت .. الحب اهتمام ابدى
صادق طالع من القلب بقصد ويجد واquy من الزمن وميعرفش
الخوف

عارف امتا الدنيا هتضحك ليك ؟ .. لما تحب ... عارف امتا
هتعرف تطير ؟ ... لما تحب
كفاية عليك اول درس فى الحب والباقى هتفهمه لوحدهك لما تحب
.. او لو اخدناه فى المدرسة !!



اجمل نصف

اصعب الاسرار هي الاسرار التي بنخفيها عن نفسنا ومش بنقدر نعترف بيها لنفسنا ... لما بنعشق بنخاف نعترف بحجم التورط التي نكون فيه وبرغم جمال الحالة وروعة هذا النوع من التورط لكن يفضل عدم ادراكنا ودهشتنا من قدرة الحب على التسرب العميق في اعماقنا ودواخلنا سبب لخوفنا من الاعتراف

كان مارد قصاص اي نوع من انواع التجارب .. كان على طبيعته القوية في التعامل مع مواقف الحياة المختلفة .. حياته زحمة من الثقافة والمعرفة والخيال .. العالم الخاص بيه كان مختلف عن باقي البشر لانه عالم اتعود على الخشونة والصلابة والثبات قصاص كل شئ والعجيب انه اتعود بطريقة عجيبة في المواجهة بانه يضحك .. ضحكته اصدق قوة ممكن تصادفها في حياتك .. كان

تسروقة الرود

ما يسمح بان العالم الخاص بيه يتهز لاي سبب .. خصوصا لو كان السبب هو الحب .. لان اغلب العوالم اللي حواليه كانت غير مستقرة بسبب التورط فى الحب فكان نظرتة للحب نظرة مقتصرة على المعرفة فى الروايات والافلام والخيال لكن فى الواقع يفضل الامر بالنسبة له مستحيل .. مكنش من الممكن انه يعرض ثبات كونه لحالة اهتزاز ..

هو الوحيد اللي لو كانت " سندريلا " سقط حذائها قدامه مكنش فكر لحظة فى انه يطاردها للارتباط بسبب جمالها الساحر ... لكن كان يفكر فى الخامة المصنوع منها الحذاء والفيزياء الخاصة بطريقة سقوط الحذاء والفلسفة المرتبطة باهداف سندريلا الخفية فى انها تسقط حذائها بهذا الشكل قدامه .. مكنش فى نيته ابدأ انه يفكر فى جمال سندريلا .. مكنش فى قلبه براح كفاية وسط الصلابة والقوة يسمح بالكائن اللزج الضعيف " فى رأيه " اللي ييسموه " الحب " بانه يدخل جواه .. كان شايف كل البنات متشابهات فى الركوض ورا الارتباط وده خلى ايمانه بنظريته اقوى .. كان مقتنع وهو فى حالة العزوبية باقتناع الرجال المتزوجين المتأخر بان العالم المثالى هو العالم الخالى من النساء لحد ما قابلها ..

المعجزة مكنتش بس فى قدرتها على تغيير نظرتة لكن المعجزة كانت فى حالة السعادة اللي هو عليها وهو بيفير فلسفته بخصوص الحب .. مكنش مصدق ابدأ بان " الكائن اللزج " هو اجمل كائنات

الارض اللى بيخليه يلمس السما...مكنش متوقع ابدا ان فى قلبه فى براح كبير لحالة جميلة من العشق والمشاعر والاحاسيس .. كل دة اكتشفه معاها .. كل دة حسه معاها .. بدون ادراك وبدون وعى اتورط فى الحالة الجميلة .. حتى الروايات اللى بيعشقها وحتى الكتب اللى كانت اجمل رفيق لقلبه بقت فى المركز التانى بعدها لان قلبه كان مشدود للبنت الحلوة اللى قاعدة ملكة متوجة فيه ... حتى خياله واحلامه كان اجملها لما كان بيرقص معاها الرقصة الحميمة رقصة الفرح .. حبها مغيرش من عالم الصلابة والقوة الخاص بيه لكن بالعكس هو ازداد قوة بوجودها .. هو ازداد قوة عشان يحميها وعشان يسعدها .. حبها مغيرش من صدق ضحكته لكن ادى للضحكة موسيقى احلى ونغمة اروع.

اصعب الاسرار ولكن اجملها هو سر الحب .. حالة الدهشة مع قدرة الحب على التسرب فى اعماقه ودواخله انتهت لانه عرف السبب .. السبب فى ان الحب هو سبب وجود الانسان وهو سبب استمرار الكون وهو أسمى معانى الله .. الطبيعى اننا نحب .. والطبيعى اننا لما نحب نعشق .. خصوصا لو اللى بنحبه كان سبب فى تغييرنا للافضل وسبب فى ايماننا اكثر بالحياة والسعادة



فرسان طروادة

تعرف لما تبقى محتاج لحصان طروادة عشان تدخل جوة نفسك
... مش من السهل انك تقتحم نفسك .. نفسك مع الوقت بتبقى
زى السلحفة .. مع الزمن ومع الضغوط ومع الخوف والظروف
بتبنى قشور فوق ضهرك وبتدفن نفسك بنفسك جوة القوقعة ..
وعشان تدخل جوة نفسك لازم تخدع نفسك بنفسك ... بس عشان
تحقق دة لازم يبقى ليك وقت بيات شتوى تعقد فيه جوة قوقعتك
وبعد كدة تقدر تخرج رأسك براحتك

بعض الاوقات فى حياتنا وخصوصا الاوقات الصعبة بتخلى كل
حياتنا تمر زى الشريط ... تعدى زى القطر قدام عيوننا ... بنحس
بحلاوتها وبمرارها جوة قلوبنا فى لحظات ثقلها سنين بس مع
مرور الشريط ومع الوصول لمحطة الحاضر بتبقى شايف
احسن ومدرك اكثر لاحسن ناس كانوا معاك فى رحلتك ويستاهلوا
يكملوا معاك الرحلة لآخرها وهى دى ميزة انك تتأمل فى حياتك
وخصوصا فى الاوقات الصعبة

انا مع بيات شتوى طويل مع نفسى ومع متابعة شريط حياتى فى الفترة الاخيرة تحديدا قررت اكتب عن الاشخاص اللى ساعدونى انى اوصل لمحطة الحاضر وانا لسه متماسك برغم كل شئ حصل ممكن يهدمنى كانوا هما السند بقصد او بدون قصد فى الاستمرار .. الفصل دة لكل اللى ساعدونى افضل " فايسى "

رجال الدين مرايا بنشوف من خلالهم الدين ... مهما فصلنا ومهما سلمنا بان فى النهاية الجميع بشر والجميع معرض للخطأ لكن يفضل رجال الدين مرايا ودى مسئوليتهم فى الاحتفاظ بالمرايا نقية وتعكس الصورة الحقيقية للدين ... هو مرايا نقية للدين فى عالم اعتاد على الشوائب هو مرايا نقية للصواب فى عالم اعتاد على الخطأ .. ولو الشوائب اصرت على المواجهة فهو ربان سفينة ممتاز قادر على التجاوز وقادر على التحدى فى اى وقت ... فى اوقات بنضعف وبنشوف فى الغلط طوق نجاة وفى الشوائب خلاص ووجود المرايات النقية زيه ضرورة لانقاذنا من نفسنا فى اوقات الضعف والرؤية الضبابية لمعنى الخلاص والنجدة الحقيقية هى من القلوب الدافية النقية مافيهاش كلايع الذات والمصلحة .. هى الضمير الصاحى فى وش الفساد الاعتيادى فى عالم الروتين والغلط اللى بيتوصف بالعادى ... هى الصوت الغاضب للدفاع عن حق من وجهة نظرها بدون خوف وبدون حساب للهوامش ... جواها حنية وحزم الاف الامهات بدون ما تكون ام حقيقية بصلة دم وقرابة ... جواها غيرة وحماس وكأنها تجميعات

لألف ثورة للمبادئ والقيم ... من الطبيعي يكون الارتباط بينها كأم إضافية ليا فى شريط حياتى مطلوب لاستمرار ضميرى ولاستمرار مبادئى قصاد الاوقات العتمة فى دنيتى

ساعات لما نكون مكسورين ادوار الشر بتبان احدى .. ساعات لما تحس انك مقهور ومظلوم بتشوف ادوار الشر افضل ... صحيح وقتها الرؤية اكيد بتكون ضبابية ومش مظلومة لكن كلنا بنكون تحت تهديد التغيير للأسوأ ... تلت شخصيات بشوف فيهم نجدة من التغيير للأسوأ لانهم فيهم الثبات على الخير مهما كان الشر مارء قدامهم .. تلت شخصيات بشوف فيهم ارواح متلونة بلون الحرية البريئة والسعادة الصافية بصدقتهم ليا بيخلونى اتمسك بالوان ارواحهم المبهجة والطيبة برغم كل مغريات العالم وشهواته فى تجميل ادوار الشر

لما تتحاصر وسط دواير ترسم شباك وتهريك .. لما المسافة تكون مليون خطوة ما بينك وبين الحل ترسم جناحين وتطيرك .. هى البساطة فى عالم المتاهات وهى السهولة فى عالم الصعوبات ... هى العفوية والتلقائية فى عالم التعقيدات .. هى الفرصة فى عز الكسرة وهى النجدة فى عز الازمة ... لو عايش مبتدأ ومحتاج للخبر اللى يكلمك .. فى بساطتها هتلاقى الجملة الكاملة .. وجودها ضرورى لاننا فى الاوقات الصعبة ساعات بننسى ان جمال الحياة الحقيقى فى بساطتها

واغلب الوقت البساطة بتكون المخرج الحقيقى للمشكلة

هو تحقيق المزاج السهل فى الوقت الصعب .. باسمه الحركى " حشيش " تعرف سبب الاحتياج لوجوده فى وقت غروب الضحكة عن المشهد ... اسلوبه المميز حتى بطريقة نطق الكلمات كفاية لاسترداد الضحكة بالقوة من احتلال الحزن لمشاعرك ولافكارك .. من الجميل ان يكون الحشيش ببلاش خصوصا لما تكون الحياة بخيلة فى منح الابتسامات ...

لما يزيد اللون الاسود فى اللوحة والعتمة تبقى فى كل الجوانب بتحتاج للالوان ولما انفاسك بتبقى مدفونة من ثقل الظلام كأنها انفاس للسكون بتشتاق للغنا ... جمالها بيبكون اللون والغنا لما تتسجن فى قصور الظلام .. جمالها هو الجاذبية اللى بتشد انفاسك من تابوت الصمت عشان تغنى مع فريد الاطرش " الحياة حلوة " .. الجمال ساعات للأسف بنشوفه لذة لا طماع جسدية لكن الحقيقة ان الجمال لذة للروح لنجدها فى الاوقات الصعبة ... جمالها اللى جواها مرسوم على ملامحها عشان يكون طوق نجاة وقت الضيق

وشوشهم اماكن مفضلة للراحة وللشفاء من كل جروح الدنيا . تعريف السعادة انهم يكونوا معاك فى كوكب محكوم من الله وما فيش غيرهم يتعايشوا معاك فيه ... اللحظات الحلوة انك تكون معاهم وتتمنى من الزمن انه يوقف ويعيد نفسه مرارا وتكرارا فى نفس اللحظات لزيادة الاستمتاع .. هما الفرسان اللى استخبوا جوة حصان طروادة جوايا عشان احقق الانتصار فى معركة بقاء النفس مطمئنة .

شلل الروح

شلل الروح هو اصعب انواع الشلل ... كسل التمسك بالامل هو
ارداً انواع الكسل .. احساس بيتسرب فى اعماقنا مع كل تجربة
صعبة نمر بيها ... احساس كالسرطان يسيطر على كل خلية فى
عقولنا وقلوبنا ويخلينا نشوف الدنيا من ضهرها .. احساس يولد
فكر والفكر يولد طبع والطبع يكبر حقيقة والحقيقة تكون للاسف "
انا مش راضى عن حياتى "

توقيت عبارة " انا مش راضى عن حياتى " : يوم ما تحس انك
مش لايق عليك ومقاس جلدك مش مقاسك والحياة بتاعتك مش
بتاعتك .. العمر يعدى قطر قدام عيونك وتكتشف انك طول الوقت
عجوز الروح فى غلاف شباب .. الملامح ناضرة جايز لكن ورد
القلب دبل من الجمود ..

شروقه الرود

توقيت " انا مش راضى عن حياتى " : يوم ما تحس ان الاحلام
بتهرب من فراغات ارادتك لانك قررت ببساطة الاستسلام ...
حواسك مبقتش قادرة تستمر فى المحاولة .. ضلوعك تتحول ورق
وتفقد قدرتك على الطيران .. تشوف الهروب طريق وتحس
الهزيمة قدر ..

توقيت " انا مش راضى عن حياتى " : لما كل اللى حواليك
يخذلوك ومتلقيش فى حزنك سند .. لما اعز الناس يبقوا فراغ
ومجرد كلام فى الهوا .. لما تعيش كفيف عشان متتوجعش اكر لما
تشوف خداعهم .. تختار الوحدة آمن البيوت وتعيش ما بين
حيطانها ...

كم مرة قولتها ما بينك وبين نفسك ١٩٩ .. كم مرة اتوجعت من
احساسها ١٩٩ .. كم مرة شوفت نفسك عاجز وضعيف وغير قادر
على التغيير ١٩٩ .. كم مرة قررت فيها الاستسلام ١٩٩ .. كم مرة
اتمنيت تكون حجر عشان متحسش بالوجع ١٩٩ .. كم مرة حكمت
على حياتك بانها محطمة ١٩٩

قعدت اراقبها بانتباه شديد وهى بتحاول تشيل الحبة وبتعافر
برغم ضعفها الواضح قصاصد حجم الحبة .. ونجحت اخيرا فى
حمل الحبة وبدأت فى الصعود فى طريق بيتها ولكن ... الحبة
وقعت منها ورجعت تانى لنفس مكانها ... كنت متوقع استسلامها

شروقه الروح

لكن هى كانت على عكسى عندها الارادة فى انها تحاول للمرة الثانية .. ونجحت للمرة الثانية فى حمل الحبة ويادوب كانت على وشك دخول بيتها ولكن .. الحبة وقعت منها ورجعت تانى لنفس مكانها ... لكن كانت ارادتها اقوى من اى شئ وقررت المحاولة للمرة الثالثة والرابعة والخامسة لحد ما نجحت فى انها تدخل بحباية القمح فى جحرها ... اذا كانت " نملة " تملك الاصرار دة فى انها تعيش لحلمها احنا ليه بنى البشر معندناش نفس الاصرار !!

كان فى امبراطور يابانى قبل الدخول فى اى معركة كان بيستدعى كل جنوده لقرعة بعملة معدنية وفى حالة سقوط العملة على الصورة يقول للجنود انهم هينتصروا وفى حالة الكتابة هيخسروا وبالتالي ميدخلوش المعركة ولكن الغريب ان فى كل مرة كانت القرعة بتصيب الصورة و كان الجنود بيكونوا عارفين ان النصر هيبقى من نصيبهم فيكونوا مليانين بالحماسة والايمان بالانتصار واستمر الامبراطور بتحقيق الانتصارات ولما كبر فى السن طلب ابنه منه العملة المعدنية اللى بتجلب الحظ فى المعارك وبيحققوا بيها الانتصار .. ولما مسك الابن العملة اتصدم .. كانت العملة عبارة عن صورة وش وضهر وكانت الصدمة فى ان الامبراطور كان مخادع ... لكن الحقيقة ان فى حياتك انتا بتحط

احتمالية الخسارة وبالتالي فى جزء جواك بيبقى حاسس انه خسران وبيأثر بشكل ما فى اصرارك طول الوقت لكن الامبراطور حط قدام جنوده اختيار واحد وهو " الانتصار " وكان واثق من تحقيقهم للانتصار

الفئة الكسولة لازم تعرف ان للنجاح ثمن ولازم يدفع ... مافيش حد بيتولد وفى بوقه معلقة ذهب ولو كان البعض له نصيب فى المعلقة الذهب فعليه انه يبذل جهد عشان تفضل المعلقة فى بوقه ... ملك من الملوك فى قديم الزمان جمع كل حكماء المملكة وطلب منهم يبحثوا عن اعظم كلمات الحكمة على مر الزمن .. ولما نفذ الحكماء الامر قدموا ١٧ صفحة مدون فيها كل حكمة الدهر ولكن طلب الملك تلخيص الحكم فالحكماء لخصوا الحكم فى مجلد واحد ولكن الملك طلب التلخيص اكثر واكثر فما كان من الحكماء الا انهم اعطوا الملك حكمة واحدة وهى " لا يوجد مطلقا غداء مجانى " ..

من الطبيعى انك تشعر بعراقيل فى حياتك فانتا مش عايش فى الجنة ولو كانت الارض فى جمال الجنة مكنش فى داعى لوجودها وكنا عشنا الخلود على الارض .. من الطبيعى انك تقابل مستحيل لكن مافيش مستحيل بيفضل مستحيل لان المستحيل ببساطة بيبقى الصعب اللى انتا بطلت تحاول فيه .. من قبل " عباس بن

شروقه الروم

فرناس " كانت فكرة ان بنى ادم يطير فكرة مجنونة لكن هو شاف الجنون واقع والمستحيل ممكن وصنع لنفسه جناحين وقرر انه يطير .. ومش مستغرب ان عباس نفسه يكون صاحب فكرة القبة السماوية لما حول سقف بيته لرسم جميل على هيئة سما ونجوم وشمس وكواكب ومدرات واقمار وكان الناس ييقصدوا بيته عشان يشوفوا السما .. عباس بن فرناس حلم بالسما وقرر يلمسها بانه يطير وقد كان ..

كلنا بنفشل .. مافيش ناجح معبرش من خلال السلم الخلفى للفشل .. لكن فى اللى بيفضل يعيش فى الهوامش نتيجة لفشله وفى اللى يقرر انه يحاول لحد الالف مرة عشان يكون تاريخ فى نص السطر .. بالرغم من انه مكنش بيسمع لكن الف اجمل واحلى المقطوعات الموسيقية " بيتهوفن " ... قالوا عنه غبى وسقط فى دراسته اكر من مرة وفى النهاية بقى من اشهر العلماء " نيوتن " ... علماء ومشاهير عانوا من صعوبات وعراقيل فى حياتهم لكن مدوش الفرصة للعالم بانه يرقص على خبيتهم او سابوا المبررات تبقى الحاكم لحياتهم

صدقنى بان الانسان مخير من لحظة ما كان فكرة فى عقل الله والله اعطى الانسان حرية الاختيار وبالتالى دة بيخلينا زى ما احنا احرار واصحاب ارادة بيخلينا تحت بند " المحاسبة " فاحنا لو

تسوق الروم

حياتنا مش حلوة فاحنا اللي مذبذبين فى سوء استخدام حريتنا فى بعض الاوقات .. بمعنى ان حياتنا فى النهاية هتبقى محصلة لاختياراتنا .. الفكرة فى اننا نختار صح ونحارب فى سبيل اختيارنا .. والحرب لازم تفضل مستمرة مهما كانت الظروف



النجارب

فاكر لسه اول مرة اعيط بحرقة لما مدرس فى الفصل ضربنى ظلم عشان بكلم اللي جنبى مع انى كنت بكلمه فى الدرس بس مكش كفاية بالنسبة له كمبرر وضربنى فيما اعتبرته انا " ظلم " .. فى المرة الثانية لما اتكلمت ودافعت عن نفسى لما حصل نفس الموقف مع مدرس تانى ... اضربت برضة فى النهاية ... الواحد وهو صغير برضة ممكن يحس بيأس واحباط مع تكرار نفس الجرح ونفس الظلم واحنا صغيرين وقلوبنا فى حجم كفوفنا الصغيرة ومش حمل تكرار ظلم ... لكن انا معرفتش الاحباط واليأس ... فى المرة الثالثة " واوعى تفتكر انى بكدة مشاغب هى مجرد صدف " لما مدرس فى حصة احتياطى ضرب الفصل كله عشان عاملين دوشة لكن انا ساعتها الوحيد اللي كنت بذاكر وهو قرر انه يعاقبنى زيهم .. اعترضت للمرة الثالثة ... بس المرة دى

جابت نتيجة ومديرة المدرسة انصفتنى واتعلمت ان المعافرة فى الحق حق وان المثالية خيال علمى

الواحد لما بيكبر بينسى اللى اتعلمه من صغره .. بينسى ان الحياة عاوزه شخص يعافر ويحارب .. وعاوزه شخص يتألم ويتوجع عشان يكبر .. افكر نفسك قبل جرح قوى او تجربة صعبة معينة حصلت من فترة وشوف نفسك دلوقت .. لو لقيت نفسك اتغيرت للاحسن فدة بفضل جرحك وتجربتك .. لو لسه واقف فى مكانك فدة لانك متعلمتش من جرحك .. لو بالعكس حالتك بقت اسوأ فدة لانك لسه لحد دلوقت فى مرحلة الدهشة وتوقع المثالية

فى نوعية بتكره حياتها بسبب جروحها تفكر الحياة لما تعرف كرههم هتديهم حاجة فى المقابل ١١٩ .. فى نوعية بتكره الاخرين وبتعتبر البشرية كلها مسئولة عن تعاستها تفكر النوعية دى هتفضل مستتية الحب والتأييد والمساندة لحد امنا ١٢٩ .. انا اظن ان عدم توقع الشئ هو سبب قوى من اسباب عدم حدوثه لانه حتى لو كان فى فرصة لان الايجابية تحصل من الحياة او الناس النوعية دى هتفوت الفرصة ...

فى نوعية اخطر لانها بتعيش بمبدأ الرقص على السلم ... امنيتها الوحيدة انها تنسى جروحها ومش بتاخذ اى خطوة ومستتية الحل السحري " النسيان " .. الحقيقة اننا مش بننسى احنا

شروق الورد

بنتناسى وبمجرد مقابلة اى حاجة تفكرنا بجروحنا تجرى خيول
الماضى بحرقه فى سكة ارواحنا وتهزنا .. النسيان مش بالطلب ولا
جروحنا شخص مؤدب لما نطلب منه الرحيل هيمشى بمنتهى
البساطة من اعماقنا ... النوعية دى اخطر لانها مستتية فرصة
مش حقيقية .. شخص بيختار يكون اعمى وبيتوقع انه يشوف حياة
افضل يعتبر سذاجة ...

مشكلتنا اتنا عاوزين المثالية ... غالبا مش بندور على المثالية فينا
لكن بندور على المثالية فى اللى حوالينا ودى مشكلة اكبر .. عزيرى
يا اللى طالب القرب من المثالية احب اقولك ان المثالية فى البشر
ماتت من زمان .. من يوم ما ابونا ادم سقط والمثالية فى بنى البشر
سقطت ... دموعك ليها قيمة متحولش دموعك لنداء اتكالى على
ان حد يطوع ويساعدك لانك فى النهاية هتبقى شهيد نفسك ...
فما فيش داعى لتوقع الكمال من الاخرين لانك انتا نفسك مش
انسان كامل ..

فى حاجات مينفعش نغيرها ... ربنا نفسه اوجد الاختلاف ما
بيننا فى نقط الضعف والقوة لحكمة ... عشان نكمل بعض ..
وعشان نسعى لربنا لانه الكامل الاوحد ... والتجارب الصعبة اللى
بنمر بيها بتساعدنا على اننا نبقى اقرب للكمال لو استوعبنا مش
اكثر .. اقرب فقط للكمال .. لكن برضة هنفضل مش كاملين ..

التجارب اتوجدت عشان تخلينا نعيش حياة افضل بكره ونبقى
بشخصية اقوى بكره .. التجارب بتدينا فرصة لاكتشاف ماهو
جديد فى عالمنا وفى اللى حوالينا ... التجربة اسلوب للمعرفة ...
التجربة اسلوب لايجاد معانى جديدة وحلوة فى الدنيا حتى لو
كانت اصعب واشقى التجارب .. مشكلتنا اننا بنتعامل مع تجاربنا
وجروحنا بالانكسار مش بالادراك للحكمة ...

الجرح عمره ما يقدر يبيت جوة قلبك غير بمزاجك .. والتجارب
لو بتشوفها بعيون مهزوزة من الخوف عمرك ما هتتحرك خطوة
لقدام ... لو بتشوف الخسارة قبل اى قرار فى حياتك هتاخده
فانتا الى حد ما خسرت .. لو بتشوف الفشل فى السقوط فانتا
فاشل فى تفكيرك لان الهزيمة الحقيقية هى انك متعرفش تقوم
بعد السقوط ... الحياة قلابة ومش ثابتة على لون واحد ولا ينفع
تكون ابيض دايمًا ولا هى ارملة عشان تلبس اسود على طول .. انتا
اللى طول الوقت بتتوقع الاولى وبتتصدم فى الثانية لكن هى
بفطرتها كوكيتيل الوان وعليك تعيش اليوم بلونه

انا جروح كثير مريت بيها فى حياتى ومغنديش اى مشكلة فى
الاعتراف بانى كثير اتجرحت .. ومغنديش مشكلة انى اعترف انى
ساعات كثير بضعف .. احنا متخلقناش الهة وانا اوّمن بان وظيفة
الاله وظيفة غير شاغرة وفيها رب حكيم ومدبر وقوى .. لكن انا

تتروقه الرود

بنى ادم ليا تفكيرى وشخصيتى ومكوناتهم اللى ببنيتها على مدار حياتى واكيد فى جزء من المكونات عيوب اتوجدت مع مرور الوقت وده يخلينى اغلط واضعف واقع ... وفى الحقيقة انا فخور بانى ضعيف فى اوقات كتير لان ضعفى ده هو اللى صنع فىا مميزات اكثر ... ضعفى ده عرفنى الناس اللى بيحبونى ووقفوا جنبى .. ضعفى ده اللى ادانى مساحة اكبر لانى اتعلم واخذ خبرات لبكره .. انا مش بسعى انى اكون اقوى واحد فى العالم لكن انا ببقى فخور بنفسى لما ابقى النهاردة احسن من امبارح وطموحى ابقى بكره احسن من النهاردة .. وعشان احقق المعادلة دى لازم اشوف وادرك ضعفى ونواقصى عشان اقدر اتطور .. المثالية تفقدك الواقعية لان ضعفك هو اللى بيعلمك بيكبرك بيقويك ..

فى حياتنا احنا بدخل حروب كتير .. فى حروب مش بنعرف ليها نهاية وبتفضل مستمرة جوانا .. وفى حروب تانية بتنتهى بهدنة صعبة فيها شخص ما بيضحى بحقه لوقت مروره بطئ وتقل بتقل الحجر على القلب .. وفى حروب تانية بتنتهى بالانتصار ونشوة الفرحة بتحقيق حلم او هدف او حق ... كل اللى فات دة و انا بقى بفكر لسه فى الحروب اللى لسه مدخلنهاش ... العالم اللى لسه معشناهوش ... الحروب السابقة جايز هى اللى علمتنا وكبرتنا وقوتنا عشان خاطر الحروب الجاية .. احنا لسه قدامنا حروب

تسروقه الرود

مدخلنهاش .. لو احنا مصدقين المثالية مش هنفكر فى الحروب
اللى لسه مدخلنهاش



أنوبيس أسيوط

" آخر حاجة ضربته بالقلم عشان يلحق الاتوبيس "

فى زاوية منسية بالنسبة له وفى ركن بعيد اوى عن الواقع ..
قاعد على الارض انسان شبح كل ارتكازه وميله على حيطة .. اصل
عكازه ادفن فى التراب ... من ملامحه تفهم هو ليه شبح ...
ملامحه باردة .. الحياة هجرتها .. فارقتة القوة ... مافيش فى
عيونه براح رغبة لان كل عيونه دموع من دم .. نظراته فى عالم
تانى مش شايف اللى حواليه لان خياله كان فى العالم اللى واحشه
اوى من ساعة ما فراقه .. العالم اللى فيه ضناه ... كان شايف
قدامه ابنه .. حواديت ابنه زى فيلم الذكريات اللى بيعدى بصوته
الضعيف قدام عيونه يحرق قلبه اكر

طعمها مر بس بشربها ويطلعوا اشاعات ان مرها سام وبتجيب
سرطان ويتموت وانا بستطعمها ... اصل مبصدقش .. عشان عارف
انها عاوزنى ... عشان عارف انها شارية ومش بايعة ... وانتا
علمتى اللى يشترينى اشتريه و اديله ننى عيني .. انا مش بخاف

تسروقة الروح

يا ابويا على فكرة من الموت فيها .. هى اللى بتخاف عليا وبتحاول
عشانى عشان اعيش .. مصر دى حلوة اوى مش كدة ١١٩٩ ... تعرف
يا ابويا بيعيط ليه وانا بقولك الحاجات دى ١١٩٩ .. عشان انا مش
عارف اصدق بس بحاول .. صدقتى بحاول ... صدقتى بحاول
اصدق انها بلدى ...

ابويا مش الوطن هو الامان امال احنا ليه بنام خايفين من
بكره ٩٩ ..

ابويا مش احنا عندنا النيل الطويل العريض دة امال ليه المية
قاطعة ٩٩ ...

ابويا مش دايم بيقولوا اننا شعب دمه خفيف امال ليه مبقناش
عارفين نضحك ٩٩ ..

ابويا انا بتحرج اوى لما الناظر بيقول فى ميكروفون المدرسة انى
مدفعتش المصاريف .. هو احنا فقرا اوى كدة ليه ٩٩ ..

ابويا هى الفرحة شكلها ازاي ٩٩ ... هى الفرحة يادوبك حنة
النطة اللى بنطها لما الاهلى بيحب جون ٩٩ ..

ابويا هو انا ليه كل ما ارسم حلم فى كراسة الرسم العيال فى
المدرسة بيضحكوا عليا وبيقولوا الحلم فى مصر حرام ٩٩ ..

ابويا هو السواد فى علم مصر زاد ولا احنا كنا بنرسم العلم
غلط ٩٩ ..

ابويا قولى هو ازاي مصر بيقولوا دايم فى المدرسة انها امى
وعمرها ما ادتنى حنان ولا عطف ١١٩٩ هى مصر مكنتش عاوزة
تخلفنى ١١٩٩ ولا انا كنت تقيل على قلبها لما جيت زى الضيف الثقيل
وكانت مستتية اليوم اللى ارواح فيه عشان ترتاح وتخلص منى ١١٩٩

ابويا تعرف المشكلة مش فى انى ميت .. دة نصيب ... لكن
المشكلة فى ان اللى بيموت فى مصر الطيبين .. انا خايف عليك يا
ابويا عشان انتا كمان طيب ..
انا عندى سر عاوز اقولهولك ..
ابويا انا عارف انك علمتنى مكذبش بس انا كنت بكذب .. كل يوم
الصبح بدرى بقف فى طابور المدرسة واقول نشيد بلادى بلادى بس
انا عمرى ما حسيت انها بلادى ... الوطن دة يا ابويا مش بتاعنا دة
بتاع الناس الاكابر .. بقول " لكى حبى وفؤادى " وانا مش عارف
احبها عشان هى بتكرهنى .. بقولها " انتى غاييتى والمراد " وانا
خدت فى درس العربى الخصوصى عشان مدرس العربى اللى فى
المدرسة ما بيشرحش ان " غاية " يعنى هدف بس انا عمرى ما
كانت مصر غاية ليا ابدى عشان هى عمرها ما اهتمت بيا ولا كنت
فى يوم هدف ليها ... ابويا سامحنى انى كنت بكذب بس هما
مصريين انى اكذب .. وكل يوم .. وعشان مضربش بكذب .. وعشان
متهنش بكذب ... بس انا حتى لما قولت الصدق اتهمت برضة
واضربت لان دة العادى ودة الطبيعى .. فقررت ساعة النشيد انى
اسكت .. فقررت مصر اللى فى النشيد انى افضل ساكت على طول
عرفت ليه يا ابويا يومها مكنتش عاوز اروح المدرسة ١٩٩٩ ... كان
نفسى اوى تسبني نايم ويفوتنى اتوبيس المدرسة عارف ليه يا ابويا
١٩٩٩ ... جايز القطر جاوب الاجابة يوم ما داسنى فى الاتوبيس ..
بس احنا اصلا يا ابويا فى مصر عايشين مداسين ودة اللى خلانى
مش عاوز اروح ومش عاوز اصحى ومش عاوز افوق ..
فجأة .. فى قلب صوان العزا قرب مديع من الاب وقاله " عاوزين

شروقه الروح

نسمع منك اخر حاجة قالها ابنك قبل ما ينزل مدرسته او اخر
حاجة سمعتها منه " ... السؤال برغم شروده وجعه ... خيال الولد
وسط دموعه ابتسم .. ابتسامة مكسورة ... الابن والاب وحدهم
عارفين اخر موقف ما بينهم اية اللي حصل ..
خيال الولد اختفى زى ما فى الحقيقة اختفى ..
مسح الاب دموعه ونطق بالحقيقة اللي عمرها ما هتفارقه
بالحقيقة الكدابة اللي كان عايشها من جواه بانه كان عاوز ابنه
يرفع راس بلده لفوق و يحبها ويصبح الولد راجل قد المسئولية فيها
... بس طلع غلطان وموهوم اوى ...
بص الاب فى عيون المذيع ونطق قلبه باصعب حقيقة : " اخر
حاجة ضربته بالقلم عشان يلحق الاتوبيس "

الانسان المسروقة

كأن الارض بساط لاحلامها وكأن العالم مخلوق عشانها ..
كانت فرحانة اوى اصل دة يوم النتيجة لآخر سنة دراسية ..
الفرحة على باب قلبها خبطت وهى فتحت ولقت اجمل صديق
واجدع حبيب كانت مستتياه من زمان " النجاح " .. كانوا دايمًا
بيشوفها جميلة وبس .. محدش شاف ورا جمالها " الانسانة "
المثقفة المتفوقة الساعية لمنافسة الجنس الاخر فى جميع مجالات
الحياة .. بمجرد ظهور النتيجة طار قلبها وراح لبيتها عشان يبلغ
اهلها قبلها .. بس جسدها كان لسه فى نفس المكان .. استوعبت
انها لازم تروح بيتها باقصى سرعة عشان تستقبل التهاني من اكر
ناس بيحبوها وبتحبهم .. كانت متعودة تركب اتوبيس شركة خاصة
وهى مروحة .. بس كان لسه بدرى على ميعاده المحدد فقررت
تركب ميكروباص من الموقف ... كان موقف الميكروباصات زحمة
جدا بس هى مخافتش ومركزتش لان قلبها متعلق بفرحتها وكانت

تسروقة الرود

الزحمة بالنسبة ليها فضا واسع .. كانت عاوزه تجرى على اقرب مكان فاضى فى ميكروباص عشان تروح بسرعة وساعدها طيران قلبها فى المهمة ... وكأن الارض بساط لاحلامها وكأن العالم مخلوق علشانها .. لكن .. سرق فرحتها وخطف ضحكتها " ندل " بلمسة مسروقة

الدنيا ساعات بتخبط فينا اوى .. هى فاهمة ومدركة بحجم طبيعة عملها بس هى بنى آدمه برضة .. الكل بيشوفها قوية كفاية انها تحتل .. لكن النهاردة المدير عنفها بشدة قدام زميلها فى الشغل بشكل صعب هز اعماقها اوى ... كانت اول مرة تحس انها مهزومة كدة .. خرجت من شغلها مليان قلبها بهموم كتيرة .. هم الفشل على هم الاحراج على هم الهزيمة خلاها كومة وجع .. مش قادرة تبكى لانها دلوقت فى الشارع ومش قادرة تمنع دموعها لانها انسانة مجروحة .. الاحساس دة بيدفعك لما تبقى فى المكان الغير مناسب ومجروح لانك تحاول تخبى نفسك فى ركن منعزل خيالى عن كل العيون .. تدفن نفسك فى خداع دايرة اللامبالاة عشان متحسس بالوجع اكثر .. الرؤية ضاقت بالنسبة ليها عشان تشوف العالم نقطة صغيرة ساعتها يمكن ترتاح اكثر .. لكن .. "الندل" داس اكثر على وجعها واستغل توهانها وجرحها اكثر بلمسة مسروقة زى الورد بتفتح فى بستان الاحلام .. ما بين البراءة والبلوغ عايشة ومستمتعة بعمرها وبانطلاقتها .. النهاردة كان عيد ميلادها الرابع عشر .. اتفاجئت من اللحظة اللى فتحت عيونها من النوم على هدية حلوة بالمناسبة دى من ابوها ... كان فستان جميل لونه

وردى بلون عالمها الخاص .. لبست الفستان وكان الاعلان على رقعة البراءة اللى فيها وحلاوة الروح الساكنة جواها .. لما قررت تنزل بالفستان تزور بيه واحدة من اصحابها كانت حاسة وكأن الاحلام بترقص حواليتها وكأن العالم بيرسل ابتساماته كطريق ليها .. كانت بتمشى بجسدها لكن روحها كانت بتجى وقلبها كان بيرقص .. لكن " الندل " اهان برائتها وتجاهل طفولتها وريحة ايده العفنة طالت فستانها الوردى بلمسة مسروقة

قطر يومها سريع اوى وبتسابق محطاته .. ست بيت ممتازة وام رائعة والكل يشهد على اخلاقها وعلى شهامتها وعلى انها زى ما بيقولوا ب " مية راجل " .. من ساعة ما جوزها مات ومحدث حس بفرق فى بيتها .. مافيش شكوى ومافيش تذمر من الاحوال .. يمكن الظروف حنينة ١١٩ .. الظروف صعبة فوق ما تتخيل والمحطات كتير فى قطر يومها والدليل انها لازم تلحق تروح مدرسة ولادها وتدفع المصاريف النهاردة قبل ما الولاد يتخرجوا فى الطابور من المدير بذكر اسمائهم علنا فى المتأخرين عن الدفع وبعدها تعدى على البنك تقبض معاش جوزها المتوفى وبعدها ترجع بيتها تجهز الاكل لولادها قبل ما يرجعوا من المدرسة .. نزلت من بيتها وفى بالها برنامج قطر النهاردة .. لسه بتقرر انها تركب اول محطة وتعيش فى جو القطر .. وقف القطر بالقوة " حيوان " على شكل راجل واصر " الندل " على انه يهدمها بلمسة مسروقة

المتحرشون ...

الرجولة فى حقيقتهم كومبارس فاشل .. ازاي المتحرش بيثبت

شروقه الرود

الرجولة بكونه " ندل " ١١٩ ... ازاي السعادة بتبقى مقززة ومتحققة
بلمسات مسروقة ١١٩ ... سرطان خستهم بينهش بلا تفرقة فى كل
شكل من اشكال المرأة .. اشباح من العتمة واطلال من السواد
وعالمهم فيه الفروق ما بين البشر والحيوان على وشك الانقراض ..
خدعوك فقالوا بان الجوع صانع الوحوش وهما نصهم متجوزين
ومخلفين .. واوعاك تقول الاعتيادى من كونها نتيجة للبطالة
والفقر لان عمر ما الفقر فى الجيوب يطلع جبان لكن الفقر فى
القلوب هو اللى بيطلع الندل .. وعمر ما يكون الانشغال لللايد
البطالة بانها تنهش فى ارواح وقلوب .. واوعاك من حل التدين
الظاهرى لانه قالب فارغ وكلنا بيه معجبين وبقالنا سنين مخدوعين
فى انه المناسب لمجتمعنا .. امنا هنعارب بجد ٩٩ امنا هنواجه
بجد ٩٩ .. لحد امنا هنفضل عايشين فى هوامش القضية ولحد
امنا هنستسلم للسلبية ٩٩ .. مازلنا مجتمع فاشل بيدارى تبريرات
اخفاقه فى جسد المرأة ولبسها .. مجتمع انانى شهوانى بيحقق
فساده الفكرى تحت شعارات دينية خادعة على حساب انسانيته
وحقيقة الايمان العملى ..

ارجوك متقولش " ماهى اللى نازلة مكان غلط " ؟ " ماهى اللى
لابسة غلط " ؟ " ماهى اللى نازلة فى وقت غلط " ؟ " ماهى اللى
طريقة كلامها غلط " ؟ " ماهى اللى طريقة مشيها غلط " ..
التبرير فى الغلط صفة الخسيس و لو بقيت فى يوم خسيس
هتصبح " عادة "

انهم اشكر

حاسس انك مخنوق قوى...حاسس انك مبقتش سعيد ويمكن
كمان استحالة تعرف السعادة
كتير انا كمان جالى الاحساس دة....كتير حسيت اد اية الحياة
وحشة وصعبة ويااااا على كم المرات اللى اتمنيت فيها اموت عشان
اخلص بقى...اخلص مش عشان اعيش فى السما بس اخلص
عشان انا مبقتش قادر اعيش فى الارض
قولى اية اللى تعبك؟؟
قبل متكلم عاوز اقولك على معلومات مهمة وانتا بتقرا الفصل
دة

تخيل انك لو عندك هدوم فى بيتك واكلك فى تلاجتك فانتا
اغنى من تينين تح من سكان العالم اذا كنت قادر دلوقتى تضغط
بزرار الماوس وانتا قاعد على الكمبيوتر فانتا افضل من ٥٠٠

شروقه الروح

مليون واحد معاق فى العالم
ولو ليك بيت ودلوقتى انتا فى امان تحت سقف بيتك فانتا حالك
افضل من ٣٠٠ مليون شخص فى العالم ملهمش مكان امن يسكنوا
فيه يأما بسبب الحرب او بسبب الفقر
انا مقدر جدا اللى بتمر بيه وبحترم احساسك ومشاعرك وبحترم
تذمرك بس تعالى نتكلم سوا فى سبب خنقتك لو هى اخطر من
الموت والتهديد والتشرد والمجاعة والحرب
عندك مشاكل فى شغلك... اشكر ربنا على ان عندك شغل
واتبسط جدا حتى لو مرتبك قليل كتير غيرك مش لاقين الفرصة
دى واستغلها وحتى لو واجهت مشاكل افكر دايما ان نفس الاله
اللى اداك الفرصة دى هو نفسه نفسه لسه موجود قدامك تطلب
مساعدته وهو هيساعدك تتجاوز المشاكل دى بس متساش تشكره
قبل ماتعابه على المشاكل لانك افضل من ناس كتير... البطالة
وصلت لاكثر من ثمانية مليون عاطل فى بلدك
عندك مشاكل فى بيتك... من اصعب المشاكل اللى ممكن الواحد
يواجهها فى حياته بس عاوز اقولك خلى عندك ثقة فى الله وفى
وعوده ان الله يجمع لا يفرق ولو عندك الايمان الكافى بده المشكلة
بتاعتك هتلاقى ليها بدل المخرج الواحد الف مخرج بس يكون
عندك ثقة وكمان لو من جواك انتا المحبة الحقيقة هتتبعك على
اى فرد فى البيت وهتلاقى السلام دة موجود فى بيتك بعمل وايد
ربنا وبمساعدتك

شروقه الرود

عندك مشاكل مع صحابك...يااااا انتا عندك اصحاب
اصلا؟؟صدقنى فى ناس كثير مش لاقين حد يصاحبوه ولا حتى
يخرجوا معاه وحاسين دايمًا بالوحدة اشكر ربنا انك عندك
اصحاب وانا عارف ان جرح الناس القريبة منك بيبقى اصعب بس
انتا ياما جرحت ربنا حاول تبدأ تتعلم ازاي تسامح وازاي تغفر
وازاي تقدر تتجاوز عن اى اخطاء وبدون كلمات زى الكرامة والفاظ
كثير اخترعناها بس عشان نفسد علاقتنا مع بعض ونعمل حدود
للمحبة

مريت بتجربة عاطفية صعبة...اين كان اللي جراك مش هيبقى
اصعب من ناس دلوقتي بيتهم متقسم بسبب الطلاق واطفال بتعانى
من خناقات كثير بين الاهل فيمكن ربنا نجاك من حاجة انتا
متعرفهاش..والحاجة الاهم انتا مش الحكاية كلها انك عاوز
حبيب...طب مش ربنا حبيبك ولا مش حبيبك؟؟..انتا بجد حاسس
بالحب دة؟؟راجع نفسك هتلاقى ان الحبيب الوحيد اللي مش
هيزعلك ولا هيخونك هو ربنا وانتا نسيت دة افكر دة وحس بدة
وتعايش مع الحب الالهى وساعتها اوعدك ان ربنا هيبتلك اجمل
قصة حب فى الدنيا بس حب ربنا الاول

حاسس انك وحيد...اولا انتا مش وحيد لانك موضع اهتمام
خاص من ربنا اذا كان ربنا بيهتم بالعصافير مش هيهتم بيك
انتا؟؟ومتقولش ان ربنا ناسيك متنساش انه الاله القوى والقادر
على كل شئ واكيد المتذكر لكل شئ يعنى هو عمره ما هيكون
ناسيك...وانتا محتاج ناس بعد ربنا؟؟..لو شبعته منه مش هتفكر

تسروقه الروح

فى ناس اصلا بس عاوز اطمئنك ربنا بس عاوز يقولك انك مش
لوحذك لانى انا معاك حس بدة وانا هديك كل الاصحاب اللى
نفسك فيهم..بس صدقتى لو وصلت لمرحلة انك عاوز تشبع من ربنا
هتسى الناس اصلا

انا عاوزك فى الاخر تبقى فاهم كويس جدا انك كائن مهم جدا
عنده اله قوى ويحبه جدا وانك موضع اهتمام اعظم ما فى العالم
وهو ربنا وفكر فى كلامى دة اول متحس انك كئيب او زعلان...ربنا
يفرح قلبك



خطابه لدولة فشخلانكا

عزيزتى دولة فشخلانكا

تحية طيبة وبعد

لقد تناقلت الانباء عن عزم شعبكم المعظم بالقيام بثورة مجيدة مثل ثورات الربيع العربى وان شعبكم قد فاض به الكيل من الفساد والفقر والبطالة فى دولتكم فشخلانكا ... لقد احترقت قطارات وغرقت عبارات ولم يحاسب أحد كما حدث لنا .. لقد صار دم البشر مباح وباقل الاسعار فيما يسموه تعويضات لا تغنى عن موت اجزاء منا مع من فقدناهم .. لقد عاش شعبكم محكوم بقبضة من الظلم والخوف بأسم " أمن الدولة " وهو فى حقيقة الامر " قهر الدولة " كما تعرضنا نحن ... جميعا اتفقنا على نفس المحركات التى حركت عقولنا واحلامنا واناارت رؤوسنا عندما فكرنا بالثورة كحل وكمخرج لكل ازماتنا ... نحن جميعا أمم تعانى من رقود حكامها عليها وكأنتا لهم بيض .. وقد حان الوقت لكى نخرج من فطسة مؤخرة حكامنا قبل ان نفقس ونخرج نعام بجينات من حكامنا ويصبح الفساد جزء منا ولا نستطيع الحراك ابدا ونتحول

مع الوقت لشخصية النعام وندفن رؤوسنا فى التراب لكى نعيش
عزيزتى دولة **فشخلائنا** نحن اتفقنا فى دولتى على ثورة .. وقد
قمنا بالثورة ... ولكن بمجرد قيامنا بالثورة اصبحت كلمة " اتفقنا "
خيال علمى ... نحن لم نعد كما كنا " نحن " ... كانت ثورة على
الفساد والفقر والبطالة ولكن استمر الفساد وزاد الفقر وتفشت
البطالة ... بدل من ان نمنع احتراق القطارات قرر القطار ان
يدوس اطفالا ... وبدل من ان نمنع غرق العبارات فقد غرقت
البلاد كلها فى بحور الظلمة ... ونعم مازال دم البشر مباح بل
والسعر يزداد سوءا واصبحنا اقل مما كنا عليه ... والآن نحن
محكومين بقبضة من الظلم والخوف بأسم " دين الدولة " ... لم
نكن نعرف اننا قبل الثورة امة غير متدينة ولكن البعض يرى الآن
اننا دولة سافلة وفاجرة وعلينا بتطبيق الدين ونشر الاسلام لانقاذ
وطننا او لانقاذ ديننا فالامر اصبح سيان فالدولة هى الدين والدين
هو الدولة الآن ... ولم يعد الدين نابض فى القلوب ولم يعد الله
ساكن فى العقول بل اصبح الله والدين مواد مكتوبة نتصارع عليها
بأسم " الشريعة والدستور "

اصبحنا لا نهتم بالعارى الفقير لكن نراقب عرى المرأة ...
اصبحنا لا نمد يدنا للفقير سوى لو كنا على وشك انتخابات او
استفتاء .. لم نعد نبحث عن حلول بل صرنا نترقب الهفوات ...
لقد زاغ بعض رجال الدين وبدلا من ان يبحثوا عن الله فى قلوب
المؤمنين اصبحوا ساسة يبحثون عن المال فى جيوب المؤمنين ..

شروقه الرود

هرب النسر من علم بلادنا وحل بديلا عنه الغراب غانما .. مازال الشباب يموت ومازال الوطن ينزف ... لم تعد الاحلام هى الهدف بل الخروج من الكوابيس هو الهدف .. فقدنا الرمز وفقدنا الاحترام فيما بيننا ... لم يعد الاختلاف خلاف فى رأى بل صراع وقتال ...

عزيزتى دولة **فشخلانكا** لقد قمنا بالثورة ولم نحقق انجاز يذكر سوى اننا اصبحنا دولة " **فشخلانكا** الجزء الثانى " ... لكن الجزء الثانى اصعب ونخشى ان يموت البطل الذى هو الشعب والخطر ان يخرج تقرير الطب الشرعى بان الوفاة طبيعية مع اننا نعلم جميعا كيف نتجت الوفاة وكيف صرنا نعيش امواتا ... لذا ارجو من سيادتكم ان تضعوا اهداف الثورة نصب اعينكم وان تتذكروا ضمير " نحن " فى دفتر يوميات ثورتكم باهتمام وبحرص ... ان لا تبحثوا عن الدين فى مؤسسات الدولة وان لا تبحثوا عن الدولة فى كتب علماء الدين ... اصنعوا الدولة بعقولكم وامنوا بربكم فى قلوبكم عندما تسقطوا النظام تأكدوا من اسقاط النسخة كاملة .. ابحثوا عن استقلال العقول قبل استقلال القضاء .. وطهروا الداخلية قبل ان تطهروا النساء ... لا تتخذوا بشعارات حصان طراودة " الجيش حمى الثورة " " الدين هو الحل " ستفترق تلك الشعارات بينكم ... لا تنتخبوا رئيس بلا دستور فتصنعوا ديكتاتور .. ولا تختاروا رئيس تابع لحزب محظور فتصبح الدولة ديكور ... لا تتحدثوا عن الهولوكست حتى لا تتهموا بالمؤامرة ولا تذكروا

البوذيين حتى لا تصيروا كافرين .. ابحثوا عن " باسم يوسف " فيما
بينكم وابتعدوا عن " عكاشة " من اجل مستقبل افضل لاولادكم
عزيزتى دولة فشخلانكا ادعونا
والله ولى التوفيق

العصفورة

عصفورة فى كل صبح جديد تتطلع تزقزق وتغنى بخفة وبمرح ..
شافها الولا ابو نبض عاشق للحياة فاختارها تبقى عصفورة دائمة
على شباكها

عقارب الساعة ساعات بتمر بطيئة بغياب الوان الحياة فى
يوميأتنا .. بنحس كأنه فيلم بدون ابطال وبدون سيناريو جذاب
وكأن الجميع فى حياتك وافقوا على دور الكومبارس .. صحيح
انتا قادر انك تكمل الفيلم لوحدهك وتواصل وتعافى بس برضة كأن
كل حاجة ناقصة حاجة ...

فعلا احنا مخلوقين بعضلات عشان تساعدنا على التعب
الجسدى ونقدر جسديا فى مواجهة ظروف الحياة ... فعلا حتى
قلوبنا مخلوقة بعضلات عشان تساعدنا على التعب العاطفى
ونقدر عاطفيا فى مواجهة جروح حبايبنا .. لكن ارواحنا بدون

عضلات ... وعشان كدة بندور ليها على عضلات فى شكل صلاة
مع الله الحنون على سبيل المثال وعلى سبيل المثال برضة ربنا نفسه
بيرسال ليها عضلات فى شكل اشخاص يقدرنا يساعدوا ارواحنا
على التعب الروحى وتقدر روحيا فى مواجهة كل شئ

هى عضلة الهية فى عضلات روحى كأن ربنا منحها هدية
تساعدنى على ارجاع الوان الحياة فى اليومية.. مش فاكرازاى
قربت منى وازاى هى دخلت العالم الخاص بيا واقتحمت احداث
السيناريو بدون ضجيج وبدون ازعاج .. كانت بذرة فى ارضى
الواسعة لكن كانت بذرة صاحبة جذور قوية قادرة على اقتحام
صلابة ارضى .. كأنها عارفة نقط ضعفى وهى البساطة
والاهتمام..


مكنتش محتاجة غير شهور قليلة عشان تثبت حضورها فى دنيتى
.. مين يقول ان البنت الصغيرة صاحبة ال ١٨ سنة تقدر توصل
للمكانة دى فى قلب الراجل صاحب ال ٢٦ سنة ... جايز لان قلب
الراجل اتعبى بتجاعيد من الزمن ومن الناس وكان محتاج لحد قلبه
بسيط و بدون تجاعيد يقدر يجدد فيه القدرة والقوة على المعافاة
.. وجايز لان قلب البنت كان لوحة بسيطة ومحتاجة لرسام يرسم
ليها اشكال الحياة اللى شافها وينقلها من عالم المثالية لعالم الواقع
عشان يطلع قلب البنت شجاع ... عشان كدة جايز تكون صارت

شروقه الروم

الصداقة برغم الفروق فى العمر مسموحة للاحتياج المتبادل ..
مش كل ما بين ولد وبنت بيبكون الحب .. فى حالة جميلة ممكن
تتخلق ما بين الولد والبنت بعيد عن عالم الحب والعشق وبالعكس
بتكون الحالة دى اكتر ثبات واكثر امان .. فالدخول فى عالم
المشاعر مخاطرة دائمة ... لكن الحالة الجميلة اللى ما بينى وبينها
هى حالة بدون خوف ... هى حالة فريدة مليانة بالصدق وبالحماية
المتبادلة وبالاهتمام المتبادل ... هى اختى من غير اب او ام لكن هى
قدرت بجينات صدق الاهتمام والبساطة تبقى عضلة فى روحى وده
اجمل علم وراثة يدرس فى تاريخ البشرية ... علم وراثة الصداقة
الخالية من المصلحة ومن فروق العمر ومن ثقافة المجتمع ومن
دوشة الحب ..

احنا كتير بنعقد كل شئ .. لدرجة ان اغلب الحاجات الحلوة اللى
مش بناخد بالناس منها كويس او مش بنشوفها بتكون قدام عينينا ...
احنا كتير بنفكر فى التفاصيل لدرجة اننا بنسى الصورة الكبيرة
... احنا ليه بندور على الصداقة ؟! .. احنا مخلوقين بالاحتياج
مش عشان ربنا بيعذبنا بالبحث ... لكن عشان ربنا بيكملنا
وبيكبرنا بالبحث وكل ما ندور اكتر كل ما ربنا بيعت لينا اكتر
ويفمهننا الكمال اكتر ... انا دورت كتير وشوفت كتير لدرجة انى
نسيت الصورة الكبيرة اللى انا محتاجها ...

ارجوك سيبك من الناس مراعاة فروق التفكير مش معناه عدم
مراعاة احتياجات القلب .. بالعكس لما تشوف حقايق اكثر وتفهم
وتستوعب اكثر هتحس باحتياج اكبر للحالة اللى تسبق معرفة
الحقايق ... الحقيقة بس بتخلينا نحارب قدام احسن لكن اوعى
تخلى الحقيقة تفقدك ايمانك وبساطتك .. وهى بالماضى والجنون
والتلقائية رجعتنى لادراك قيمة متعة البساطة مرة ثانية ..
عصفورة فى كل صبح جديد تتطلع تزقزق وتغنى بخفة ومرح .. وانا
قلبى صاحب نبض عاشق للحياة .. ازاي يرفض وجود عصفورة
بتدى بغناها شجاعة لروحه فى مواجهة الحياة ١٩





المزيكا

متعود انه يسمع صوت فيروز مع لحظات وداع الليل الاخيرة ..
صوت فيروز هو الصوت اللى بيخلي كل واحد فينا يلمس ولو
للحظات قلب قلبه وعمق مشاعره .. كان مجهز كل حاجة عشان
يبعد عن الدوشة والزحمة وكل حاجة صعبة شافها فى اللحظات
البسيطة الاخيرة من يومه .. فرصته انه يحارب الحياة بتبقى فى
صوت فيروز .. طلع فى البلكونة بشورته وفانلته ومع عصيره
المفضل وصوت فيروز العالى بيحرك كل شئ حواليه للاعلى ...
بيجرى على كوكب النسيان عشان يمسح همومه .. غمض عينيه
وبدا يحلم بكل شئ جميل ...

لكن دندنة بسيطة بدأت تقاطع تأملاته الخاصة .. الدندنة لفتت
انتباهه وخرجته من دايرة الاحلام لعالم الواقع وكانت الدندنة

شروء الرود

اشبه بمزيكا جميلة ولكن غريبة .. كأنه صوت مدفون من سنين
وبينادى بالحياة ... لكنه كان صوت دافى اوى وفيه مغناطيس
بيجذبك .. ساب كل حاجة وبص من البلكونة عشان يعرف مصدر
الصوت .. راجل عجوز فى عتمة الليل بيحنى ظهره على الارض
وكان ببساطة بيدور على لقمة اكل فى كوم زبالة لكنه كان بيغنى ..
عجبية !!

ازاى المزيكا بتقدر تخرج منه وهو موجوع ؟ .. ازاى الالم والفقر
والجوع بيطلع منه مزيكا ؟ .. ازاى بيعيش بالمزيكا وهو فى حكم
العالم هامش ؟ .. والاهم ازاى دندنته البسيطة قدرت تنافس
جمال صوت فيروز فى انها تجذب زى المغناطيس ؟ ... يا ترى هو
بيفكر برضة فى انه يحارب الحياة فى لحظات وداع الليل الاخيرة
بانه يغنى ... للدرجة دى هما متشابهين ؟

مقدرش يقاوم فضوله .. جرى على المطبخ وجمع كل الاكل
الموجود فى تلاجته .. ملهوف على المقابلة مع الرجل البسيط قبل
فوات الاوان ... خرج بالشورت والفانلة ونزل على السلم ومكنش
عارف السلم هو اللى بيساعده ويختصر نفسه بنفسه عشان
يوصل ولا هوا اللى كان بينط عشان يلحق الراجل الفقير ...
الفضول ناحية الحقيقة سر الوجود ودة كان سبب اندفاعه
لحظات بسيطة بدون اى كلام .. مجرد وشين بيضحكوا

بابتسامات متبادلة .. عيون مليانة فضول بتعرض المساعدة و عيون مليانة امل بتقبل المساعدة ..

آكل الراجل البسيط وكان على وشه ابتسامة رضا .. ضحكة حقيقية وصافية وصادقة مفيهاش اى شوايب مرسومة بايمان على لوحة تجاعيد الزمن فى ملامحه ... عيونه مليانة شكر .. الفضول مستمر وبيزيد مع الوقت والاسئلة عاوزة تهرب من قيود الانتظار .. لاحظ انه اللي اكله اكل بسيط اوى ومش بياكل بنهم ولهفة زى ما كان متوقع .. بالعكس صوت الدندنة كان لسه بيطلع بمنتهى الهدوء مسموع وكأن الصوت خارج من قلبه .. لحظات بسيطة والراجل العجوز خرج من جيوبه المقطعة اكياس سمرة كان متعشم يرجع بيها مليانة عشان خاطر عياله .. بدأ الراجل يجمع الاكل فى الاكياس السمرة وكأنه اب بيجمع الهدايا لولاده .. على وشه سعادة اكتشاف كنز .. مراقبة تصرفاته بتزيد اللهفة على الاجابات للاسئلة .. بعد ما انتهى رفع ايديه وعينيه للسما يشكر ربنا على النعمة ورفع عينيه المليانة حكايات فى عينين المحتار يشكره على المساعدة .. المحتار مقدرش يتحمل وهربت الاسئلة من سجن الانتظار عشمانة فى اجابات تفهمها

ازاى المزيكا بتقدر تخرج منك وانتا مروجع ١٩ .. ازاى الالم والفقر والجوع بيطلع منك مزيكا ١٩ .. ازاى بتعيش بالمزيكا وانتا

شروقه الرود

فى حكم العالم هامش ١٩ ... ازاي الندنة البسيطة غلبت فيروز
الجميلة وجذبتى زى المغناطيس ليك ١٩ .. احنا ياترى متشابهين
فى انك بتغنى عشان تحارب الحياة ١٩
ابتسم الفقير وبدون اجابة اتحرك بعيد عن المشهد ماسك فى
ايدة كنوز عياله وشوية بشوية بيختفى بهدوء من المشهد ...
والمحتار زى ماهو فى مكانه بيفكر اكثر واكثر فى الحقيقة .. مكنش
غضبان من عدم الحصول على الاجابات لكن كان مصدوم من
الاحساس اللى بدأ يحسه جواه
رجع للبلكونة مع عصيره المفضل بشورته وفانلته بيسمع صوت
فيروز لكن المرة دى مش عشان ينسى لكن عشان يستوعب و يفهم
بعد دقائق ابتسم و فتح دفتر يومياته وكتب
" المزيكا اللى جوانا مش محتاجة معجزات عشان تخرج .. المزيكا
اللى جوانا محتاجة بس " الرضا " .. الحياة بسيطة وجميلة مش
زى ما احنا متخيلين .. احنا فاكرين اننا محتاجين نحارب الحياة
عشان نكمل .. لكن الحقيقة احنا بس محتاجين نحارب اعدائها
عشان نكمل ... اوعى تحارب حياتك واوعى فى يوم تكرهها ...
الحياة مزيكا والمبايسترو لكل حاجة حلوة فيها هو " الرضا "

كل سنة وانا طيب

كل سنة وانا طيب

نقطة ومن اول السطر ...

- اية دة احنا لسه هنبدأ من الاول ٩٩ ... طب ما الصفحات
اللى فاتت مكتوب فيها كتير اوى وفيها وشوش كتير بتضحك
بس انا لسه مش بضحك اوى ...
يعنى دة مبرر اننا نبدأ من الاول ١٩ ..
انا بس عاوز اضحك اكر ويجاد ومن قلبى ..
على فكرة انتا ضحكت كتير اوى ويجاد ومن قلبك ..
امتا دة ١٩ ...

فاكر يوم لما حلمك لمس واقع البداية و كتابك خرج للنور وبقيت
رسميا كائن يعيش ويتعايش فى كوكب الادباء ٩ .. فاكر يوم ما
مديرتك قالت عليك من احسن الدكاترة الموجودين فى الادارة

تسروقت الرود

عندها ونجحت فى انك تخلى وحدة صحية عادية تبقى وحدة طب
اسرة معتمدة من الوزارة وخذت لأول مرة مكافأة فى حياتك ؟ ..
مش سامع المزيكا اللى فى اراء الناس اللى حواليك اللى شايفينك
بعيون حلوة !!؟ ... ومش شايف الاصحاب الحلوين اللى حواليك
اللى بيرسموا حياتك بالالوان ؟! ... مش واخذ بالك من اجمل
قوس قزح فى سقف يومياتك بوشوش اطفال بتحبك من قلبها
وبصدق عشان انتا كمان بتحبهم ؟! .. انتا طماع على فكرة

- انا مش طماع انا لسه ولا حاجة برضة !!

- عندك حق بس ولا حاجة اللى انتا فيها دلوقت على الاقل
اعتبرها " صفر " ... يعنى مش بالسالب ... يعنى على الاقل غيرك
كثير عايشين فى السالب ..

- مليش دعوة بغيرى ..


- عندك حق بس على الاقل انتا حطيت هوامش وخطوط
لاحلامك عشان بكره يكون احلى .. انتا كل سنة بتزود عضلات فى
قلبك وفى روحك عشان تحارب احسن وتكون اقرب من اى وقت
للى انتا عاوزه

- بس فى ناس مش بتحببنى وانا مش كل الناس شايفنى حلو
يعنى ..

- قاعدة النجاح الامثل هى ارضاء ربنا وقاعدة الفشل الاكبر هى

- ارضاء الناس .. اكسب ربنا وكفاية دة الوحيد اللى هيشبعك بجد
- بس كان فى حاجات صعبة عشتها ولسه جروحها عايشة
- وفى ناس خرجوا من حياتى ونفسى ارجعهم ..
- امسك فى ايد ربنا وهو هيقويك على جروحك ... واقفل باب قلبك على الناس اللى عاوزة تفضل فى حياتك عشان طول منة برة قلبك بتدور على اللى مش عاوزك ممكن تهمل اللى بيحبك بجد ويروح منك فى الزحمة .. ولو حد بيحبك بجد هيرجعك ولو ربنا شايف ان رجوعهم فى مصلحتك اكيد ربنا هيسمح ...
- الانتظار صعب ..
- الايمان حلو ...
- هو انتا عندك رد لكل حاجة كدة ؟
- لا مش عندى ... انا لسه بفهم وبكبر وعمرى ما هشبع من طفولتى اللى جوايا اللى عندها رغبة فى انها تعرف اكتر وتتعلم اكتر
- طب واية اللى بالى بالناس هنعمل فيها اية ؟
- شوفت يا فالح ... اهو فى دى بقى معنديش رد





طاقة نور

قالت : عيونك جميلة عشان بتشوف الناس حلوة

جايز لكن انا مش ببيع الصدق بالكتابات ولا عشان اكون صاحب
عيون رسام اكذب الريشة وارسم الحملان ديابة او اشوف الديابة
احباب ... انا مصدق الحقيقة اللي بكتبها وقبل ما اكتب هتلاقى
على عيوني كلام وما فيش اصدق من كلام العين وما فيش اقرب لى
من قلمى عشان كدة انا والقلم اصحاب

دة غير ان فى ناس لازم تتشاف حلوة ... مهما كانت عيوبها فى
نظر غيرى .. بس انا بشوفهم بصورة مختلفة جايز لأنى فى حالة
احتياج لانى اشوفهم بالشكل دة او جايز لان مساحة جمالهم اكبر
... وجايز لانى شايف ان من النضج انى اشوف عيوبى الاول قبل
ما احكم على عيوبهم والافضل انى اركز على ايجابياتهم واتعلمها
.. وجايز عشان فعلا عيوني حلوة .. انا حاليا احترت فى حقيقتى
الى جايز حد افضل منى يقدر يوصفها ... بس الاشخاص اللي

شروق الرود

جايين فى الفصل انا مصدق اللى هكتبه عنهم لانهم مصدر الهام
لحاجات اتعلمتها فى حياتى

اختيارى للجنس الناعم فى الفصل دة تحدى ما بينى وبين نفسى
لوصف جمال القلوب وانه الاجدر من وصف جمال الملامح ... كان
اختيارى من وسط قلوب كثير صادفتها واعماق كثير لمستها وجايز
يكون فى شخصيات لسه تستحق

الوصف لاربع شخصيات منعا للتطويل ورغبة فى التركيز على
توصيل المقصود من الوصف

الشخصية الاولى : تأكد انك كل ما تطلع سلم فى سما روحها
انتا فى الواقع يادوبك لسه فى سابع ارض .. جرعة مركزة من
الحياة الحلوة فى التعامل معاها .. لكن احذر الادمان .. قرب منها
بقصد انك تحب الدنيا اكتر ... صاحبة النمش جريئة لان حريتها
زاد قلبها ومتقبلش بقيود من خيوط عتمة مصنوعة من حدود
واوهام الناس .. انك تخرج من حفلة اوبرا لعمرى خيرت على
مسرحية كوميدية لعادم امام فانتا قدام شخصية من كوكب تانى...
هى قادرة تدخل فى حياتك موسيقى تسعد روحك وهى قادرة
تخرج من قلبك ضحك من نوع جديد .. بدون مجهود يذكر منها
هى قادرة تفرحك .. صندوق ذكرياتها مقفول بقفل السكوت لكن
صداقتها كتاب مفتوح لو حبيب تعرف ازاي تبقى صاحب جدع

الشخصية الثانية : ساكنة فى ركن بعيد .. من زاوية مختلفة ..
لأنها مميزة فى التفكير قررت الانفصال بخيالها بعيد عن كل

تَرْوِقه الرود

القلوب اللى مبيحسوهاش .. لكن هى مستعدة تبقى حاضرة ومتواجدة لو احتجت لتمييزها فى دنيتك .. يعنى لو حياتك ابيض واسود هى من الشخصيات اللى تقدر تدخل فى حياتك الالوان .. المشكلة فى اننا اوقات مبنشوفهاش لان مساحة بحثنا مبتروحش لركنها البعيد ... اكتر حاجة استوعبتها بان احسن فرص فى حياتنا بتصادفنا هى معرفة الناس .. وهى من اجمل الفرص .. بس ازاي تعرفها برغم المسافات هودة التحدى ... وهودة معنى انك تعافر عشان تخلق فرصة ... الحكاية تستحق

الشخصية الثالثة : هى طفلة على هيئة بنت كبيرة ودة بيخلى طعم شخصيتها مسكر .. وزى الارنب فى شقاوتها وفى حركتها ودة بيجبرك على انك تبادلها شقاوتها ... عشان كدة هى كارتونك المفضل اللى كنت بتستاه بلهفة عشان تضحك من قلبك ... هى زى الهدية فى عيد ميلادك اللى مش بتمسك نفسك عن فضول اكتشافها .. قلبك يصغر معاها سنين لو قدرت توصل لصداقتها لانها بتقدر تشيل الدسم اللى بتصادفه فى يومك وتشيل تجاعيد همومك ويبقى اليوم خفيف على بالك وعلى روحك

الشخصية الرابعة : من الناس اللى قلوبها فى وشها لسه ما اتلونتش ... من الناس اللى قلوبها فى عيونها لسه ما تغيرتش .. حتى نغمة صوتها المميزة مفارقتهاش ... مبتكبرش وكأن قلبها ميعرفش التجاعيد ... وقلبها الابيض دة هو سر ضحكتها وانك تعيش نقى فى وسط عالم ملوث قدرة مش سهلة هى تمتلكها ..

البساطة فيها كنز لا يفنى وازاي تعيش بسيط فى عالم ميعرفش
غير التعقيد والشخايبط محتاج لايمان قوى ودة هو سبب قوتها ..
دة مش بس وصف لجمالهم اللى جواهرهم .. دة وصف لحقايق
تقدر تقابلها وتلمسها فى شخصيات فى حياتك .. بس انتا شوف
الناس بعيون حلوة .. بس انتا دور فى القلوب ومتتعاملش مع اللى
حواليك بالقشور ... اول شخصية فى البداية كنت بشوفها بشكل
تانى عشان كنت متعود اشوف بعينيا ... تانى شخصية مكنتش
شايفها عشان انا كانت مساحة عينيا محدودة ... ثالث شخصية
ممکن مكنتش اكتشفتها لو فضلت عايش بمفهوم النضج بانى اكبر
مع ان النضج فى عمقه انك تبقى طفل .. رابع شخصية لو كنت
بعيش بدماغى مكنتش حسستها .. احنا محتاجين لعيون حلوة
ولمساحة رؤية اكبر وبدون قوانين العمر وبدون ترتيبات العقل المسلم
بيها عشان نشوف اعماق الناس

هما وسط كراكيب الدنيا كائنات قررت تعيش بترتيبها الخاص
... لما الشمس تشرق عليهم بيعكسوا الوان تعبى كل اللى حواليهم
بالحياة ... قلوبهم متششقة عشان طاقة النور اللى فيهم تخرج
للعالم ... زى الهوا المنعش اللى ييخبط فى الوش .. وجودهم
فرصة لاثبات ان الناس لسه حلوة

اللغم

لما تخاف تخرج انفاسك بطريقة غير مناسبة منعاً للانفجار ...
لما تكون تحركاتك ممنوعة منعاً لحدوث كارثة ... لما تتحول لعاجز
ومستسلم ويصبح الامر خارج عن سيطرتك .. لما تكون فى حزن
" اللغم "

سمعت عن البطل الخارق المشهور بأسم " لا يخاف الموت "
تعالى اعرفك على النوعية المزيفة ..

مخلوق من طين لكنه كان مبهر ... كان فى نظر الكل موهبة من
نور ... عضلات عقله تفوق عضلات جسمه ... كانت الموهبة
القدرة على فك الشفرات .. اعقد واصعب الشفرات كانت قصاص
موهبتة مجرد لغز بسيط فى مجلة ميكى .. محتاج لوقت بسيط
بانه يمارس اسلوبه الاعجازى فى عيون الناس فى حل الشفرة ..
فى العقول حفر اسمه بحروف من نور بكبرياء البطل .. الشفرات
مكنتش مجرد شفرات لعمليات حسابية او الكترونية ... الشفرات

كانت شفرات قنابل والغام ... مجال الخطأ فى محاولاته كان " صفر " ... صحيح مافيش مجال للخطأ فالموت فى الحالة دى مؤكد ... لكن كان يملك التحدى والقدرة على المواجهة وعدم الهرب وفى عصرنا دة " معجزة " .. عنده القدرة على النجاح و الحفاظ على استمرارية نسبة الخطأ عند الرقم " صفر " .. عنده القدرة على الثبات و منع الضعف والخضوع فى لحظة لقاء الموت مع الحياة

العجيب فى اسلوبه هو اصراره على التمسك بالمواجهة فى اخطر الظروف ... ازاي واحد يقبل يضحي بمتعة الحياة السهلة ويخاطر بمقابلة الموت كل يوم !!؟ .. العجيب فى عدم رغبته فى اى محاولة من المحاولات انه يفكر يرتدى اللبس الواقى ضد الالغام والقنابل ... ازاي يرفض الحماية ويستسلم للمشيشة وللموهبة !!؟ العجيب فى انه بيواجه .. ويواجه .. ويواجه .. ومافيش فرصة للتردد لانه يدخل فى قلبه ... مافيش براح للخوف فى روحه .. ازاي البرود يفضل صامد قصاص جمر الخطر !!؟ ..

هل هو واحد من البشر واتحول مع الوقت لمعجزة !!؟ ... ولا كان فى الأصل معجزة وعاش فترة " عادى " وسط البشر !!؟ احنا مش بنتولد معجزة يبقى الاقرب للحقيقة انه واحد من البشر واتحول لمعجزة .. لكن بما انه واحد من البشر فين المشاعر فى حياته !!؟ .. هل كرسى مشاعره مشغول !!؟ ..

شروق الورد

طب لو مشغول فمين القادر على انه يعيش مع انسان بيواجه الموت فى كل لحظة !!؟ ..

مين يقبل بانه يتحمل خطر فقدان اعلى واقرب الناس ليه فى كل يوم !!؟ ..

مين اللى يتعايش مع القلق وانه يكون تؤام روحه ومين اللى بالنسبة له الانتظار كائن لزج بغيض مضطر يعيش معاه يوميا ويقبله كضيف ثقيل فى عالمه !!؟ ...

فلاش باك . خيانة .. فلاش باك .. هزيمة

من سنين وهو انفاسه محبوسة ... السجن كان اقرب انسان فى حياته .. وخانه .. حوله لكتلة من الحجر

من سنين وهو احلامه مقتولة ... القاتل كان اقوى ضحكة فى دنيته .. وقتله .. حوله لجثة من الجمود

الحقيقة ان من زمان اوى و مسرح حياته كان مليان ممثلين بارعين ... وفجأة خلصت المسرحية والجماهير صقفت .. العرض خلص والممثلين مشوا ... فجأة كراسى مشاعره فضت من بعد مغادرة كل الناس للمسرح .. فجأة اكتشف انه اتخان واتهزم ...

قرر يعاقب الحياة بشكل مختلف .. قرر كل يوم يحط فى مسرح حياته "لغم" ..

زمان لو كان قصاد لغم كان بيحاسب على انفاسه منعاً لخروجها بشكل غير مناسب وينفجر .. كان بيمنع تحركاته بعشوائية منعاً للكارثة ... كان بيقبل انه يكون عاجز ومستسلم لسير الظروف

وللمشيئة حرصا على الحياة .. لكن اللغم كان اذكى منه ..
ومع اكتشاف المصيبة مكنش للأسف ذكى للمرة الثانية فى
مواجهة حقيقة الحياة ...

صحيح انه من زمان اوى عرف ان مافيش داعى للخوف من الموت
عشان خاطر الحياة لان الحياة نفسها بتمارس الموت معنا فى كل
لحظة بالبطئ ... صحيح جايز اللغم كان قادر يقتله مرة واحدة
لكن الحياة قتلتة الف مرة .. صحيح مكنش فى داعى لارتداء سترة
واقية ضد ماردر الموت لانه جرب السترة الواقية ضد قوة الحياة
ومجبتش فايده ..

لكن الحقيقة مش انه كان بطل فى مواجهة الموت ... الحقيقة فى
حقيقة البطولة انها كانت عدم رغبة فى الحياة
خلى بالك مش كل اللى بيخاف من الموت شجاع ... فى ناس
بتهرب فى حضن الموت خايفة من الحياة

الفرح

بداية الحدوتة مكان مبهج للعيون والقلب ... قاعة فرح
زحمة ودوشة فى كل ركن فى القاعة ... انواع من الوجوه منتشرة
فى كل ناحية ... فى ناس مبسوطة وناس قلقانة وناس مبلمة وناس
حزينة .. الناس الحزينة حزينة ليه مع انه فرح ؟! .. معرفش ..
خلينا نكمل
كراسى وتراييزات وناس حوالىها ناس ... زحمة كبيرة والكل
مستنى العريس والعروسة وانا منهم ... اة نسيت اعرفك بنفسى ..
معلش اصل الفرح كان واخذنى
انا اسمى " انا " ... اية مالك ؟ ... اعيد تانى عليك الاسم .. انا
اسمى " انا " ... شكلك بتشك فى نفسك ومش عارف تقرأ بس
الحقيقة ان اسمى زى منتا شايف كدة ... مش مشكلة اكون ذكر او
انثى لان عصر العولمة بقى صعب تمييز الصنف والنوع وبقت منى
زى احمد والولد زى البنت كما طالبت الفنانة سعاد حسنى بس

مكنتش تقصد المفهوم اللى وصلنا ليه دة وبقت الحكاية بسبب
المساواة هيصة ... هيصة !! ... احنا نسينا الفرح .. مش احنا هنا
عشان الفرح ... مستتين العريس والعروسة ... اهم جم هناك ..
الموسيقى بدأت والفرقة اشتغلت ... يلا بسرعة نشوف العريس
والعروسة .. لووووووووووووووووووووو
اة نسيت اعرفكم بالعريس والعروسة ... وصف الفرح واخذنى
اوى

هعرفك بالعريس الاول ... بص يا سيدى العريس اسمه " دنيا "
.... العريس مقولكمش عليه جميل جدا .. بس من برة بيان وسيم
لكن من جوة مقدرش اقولك على الوهم اللى ممكن تعيش فيه لو
فضلت تحكم عليه من برة ... اصل انا عارفه من زمان اوى ومن
لحظة ما وعيت على ال " دنيا " ... ايوه اقصد من لحظة ما وعيت
على العريس

انما العروسة بقى .. بصراحة مكديش عليك انا معرفهاش قوى
مع انى المفروض عارفها كويس جدا بس تاهت عن ذاكرتى ويمكن
السبب فى دة انها بتحب دنيا ومش فاضيلى بقى بلا " انا " بلا بتاع
دلوقت .. " انا " اللى هو اسمى متساش

الطبل والموسيقى والمزمار والزغاريد والقاعة هايصة ومزقطة
.. انا مبقتش سامع نفسى ... جريت كدة انادى عليا واقول " يا انا
" يا انا " ومش سامع ولا كلمة .. مش مشكلة المهم ان الفرح
مستمر ... شوية والجو بدأ يولع من الضحك والدوشة والفرح

شروق الرود


يهيئ أكثر وأكثر ... وناس ترقص وناس تشرب وناس تأكل ...
البوفيه مفتوح والناس معدتها فاضية .. الجو مليان عشوائية
وفوضى تحت مسمى الفرح .. وفجأة
ملامح العريس اتغيرت وبطل رقص وغنا ... ساب ايد العروسة
.. ساب الفرح

من غير مقدمات غادر العريس قاعة الفرح .. مشى العريس
بدون ما ينطق باى كلمة .. والغريب محدش من الناس وقفه .. ولا
حد حاول يعترض طريقه ويسأله على السبب ... رد فعل الناس
كان الصدمة وبس .. اللي كان بيضحك بقى بيصوت ويبصرخ ..
اللى كان بيرقص بقى فى الارض من اثر المفاجأة .. والحالة العامة
ما بين الدهشة والحزن ... وبعد فترة فى حكم الزمن لحظات وفى
احساس الحدث سنين .. بدأ الناس تغادر القاعة .. واحد ورا
التانى .. واحد ورا التانى ... لحد ما الناس كلها مشت ماعدا ايتين
" انا والعروسة "

العروسة كانت قاعدة على ارض القاعة وفستانها الابيض باهت
من الحزن والمفاجأة ... كانت وشها فى الارض ومصدومة ... اكيد
عندها حق دة عريسها سابها فى ليلة فرحها وحتى الناس .. اقرب
الناس كمان سابوها لوحدها وفى مصيبتها ... كل اللي قدموه
صدمة ودهشة ومحدش فاكر يساعدها ... صعبت عليها فى حالتها
... بقى دى اللي كانت بتعيش اجمل لحظات حياتها من شوية
بسيطة تبقى فى الحالة دى دلوقت !!؟ ... مش عارف هقولها اية

بس انا لازم احاول اخفف عنها ... قربت منها ... قربت اكتر ...
لمستها بلمسة كلها حنان وطبطقة خارجة بصدق من قلبي .. ديرت
وشها من على الارض ليا ... لقيت العروسة شبيهى تمام .. لقيت
العروسة " انا "

نحن نلوم القدر على واقعنا مع ان واقعنا بايدينا حتى لو كان
القدر ثابت ... عزيزى ال " انا " ارجوك مضيعش حياتك فى اللهو
واللعب والفرح الخارجى ... اكتشف نفسك والحقها قبل ما العمر
يفوت والقدر يصدر حكم النهاية على فرحك الخارجى وابدأ عيش
فرح حقيقى مع الله ومع نفسك ومتنساش نفسك وعلاقتك مع ربنا
فى زحمة الفرفشة فى الوشوش اللى حواليك



جواهره الخشبى يطير

هى من اصحاب القلوب الحاملة لا يليق بها الحداد .. عندما
تحزن تحلم ومن الاحلام تخرج اطفال تضحك وتهرب لخيال
افضل .. هكذا تعيش وهكذا تمضى ايامها ... تبدو مرتاحة لما
هى عليه الآن ... تكره كل ما هو عادة ولكن تحب ايضا كل ما هو
بسيط .. تضحك فى كل الاحوال .. لا تخشى ان تفقد احد لانها
لا تقترب كثيرا من احد ولهذا هى قوية معظم الوقت وان كان
البعض يرى فى ذلك قسوة فهى لا تهتم ... لا تتأقلم كما هم
يريدون بل تترك العالم ليتأقلم معها اذا اراد
هو من اصحاب القلوب الحاملة لا يليق به الحداد ايضا ..
عندما يحزن يأمل فى غدا افضل ... الشمس لن تغيب مطلقا
هكذا هو ايمانه وهكذا يعيش وهكذا تمضى ايامه .. يرى فى
الابتسامة معنى الحياة ... يهرب الى الخيال عندما لا يضحكه

الواقع ... فالخيال ماهو الا تحايل على الواقع لنفوز بكل شئ ..
يراه الجميع قويا ولكنه يعلم انه ليس كذلك بعد .. القوى هو من
ليس لديه اى شئ ليخسره ... وهو مازال يتعلق بالآخر ومازال
يبحث عن الجمال الداخلى ليقتررب اكثر ... وعندما يصدم لا
يضعف امام العالم ولكن بينه وبين نفسه فى زاوية ما يحزن ..
لكنه لا يهزم ويضحك من جديد ويحاول اكثر ...

هى ترى ان كل الرجال سيتمطون جياذ خشبية عندما يتقدمون
اليها ... قد يكونوا من اعظم الفرسان ولكن هى ليست ببساطة
اميرتهم ... سيزعجها الضجيج ولن ترغب فى مبادلة الشاعر ..
هى لا تبحث عن التباهى بعشق لا مثيل له ولا ترى فى الحب
خلاص من اى شئ .. بالعكس قد تضعف حينما تحب وهكذا لن
تجد الراحة كما اعتادت ... لهذا فهى امرأة صعبة

هو رجل سخى فى كل شئ عندما يهتم وعندما يساعد وعندما
يرغب ... هو سخى فى ايمانه واحلامه ... وعندما يحب سيقدم
ايضا السخاء فى مشاعره ... السخاء العشقى الذى لن تشبع منه
حبيبته ابدا .. سيخلق بها الى اعلى السموات والمشاعر المتفجرة
ستكتب بحروف من ذهب فى حواديت الاساطير .. هو لا يبحث
عن التباهى بانه العاشق الفريد من نوعه ولكنه صادق فقط
والحب اصدق معانى الوجود .. والحب كذلك جنون ... فمن صدق
حبه سيكون مجنونا

القلوب الحاملة فى الواقع تقابلت .. هو احبها وهى لم تحبه ...
ولكن لماذا ؟

ضجيج الاحداث يطفو على المشهد ولكن الحقيقة تبدو سهلة ...
لا يولد حب بدون مسافات .. تلك المسافات هى التى تخلق الحالة
الفريدة التى تحرك المشاعر المستترة واللهفة الغامضة .. تلك
المسافات التى تخلق الاسئلة الباحثة فى الاجابات فى احضان
الزمن .. تلك المسافات التى تحيرنا اذا كان ينقصنا شئ بدونهم او
اذا كانت الامور تختلف فى قلوبهم حينما يرونا ... تلك المسافات
فى انك لا تحب اقل ... وايضا بانك لا تحب اكثر .. فالاهتمام
الزائد قد يخلق عادة والبعد الزائد قد يخلق نسيان ..

كان عليه ان لا ينازل الحب ويهزمه .. لكى يحيا الحب كان عليه
ان يحبها اقل ... كان عليه ان يدرك انها لا ترغب فى الاضواء
الكاشفة وانها تحب البساطة .. وكان عليها ان تدرك انه احبها
بصدق دون رغبة فى التباهى ... وان صدق الحب جنون وان جواده
الخشبي يطير

وصية

محدث عارف هيعيش قد اية ... قطر العمر من حقه يقف فجأة
لو اراد ربنا بدون ما اكون عارف المواعيد المناسبة لانتقالى ...
ومدام فى العمر بقية ومدام قطر العمر موصلش لمحطة النهاية
فمن الافضل انى اكتب وصيتى ..
كنت بفكر فى مشهد كتابة الوصية من فترة حتى وصل تفكيرى
لخيال المشهد وانا بكتب الوصية .. ضباب كثيف حوالين المشهد مع
برودة طقس وداع النهاية واللحظات الاخيرة قبل محطة الغياب
الابدى ... شمس بتجرى تستخبى فى سحابها زى اللحظات
الاخيرة بتجرى لخط النهاية ... وقمر انانى مش راضى يطل عليا
ببهجته فى الوداع ويمكن لانه زعلان عشانى ... وانا بستحضر
دموع من عمق قنواتى الدمعية للكتابة الحزينة المطلوبة ... للكتابة
عن اللى بحبهم ... مع ورقة اضافية فيها كل الاشخاص اللى
بحبهم واللى مش بحبهم حتى .. وكمان ببقى مكتوب فى الورقة

شروقه الرود

ممتلكاتى واموالى " غالبا الورقة هتبقى فاضية " عشان اوزع ثروتى
" دة لو فى ثروة "

ايد مرتعشة وقلب حزين وعقل مستسلم لفكرة الموت هيكون
الوصف المناسب لاستعدادى لكتابة الوصية .. لكن الموضوع فى
الحقيقة وانا بكتبى وصيتى مكش زى الخيال ابدا
والدتى داخلة طالعة من المكتب وانا بكتب الوصية وفى كل مرة
بتدخل بطبق فيه اكل خفيف وبتخرج بطبق فاضى .. يعنى مافيش
ضباب واصلا الجو حر وانا مشغل المروحة قاعد باكل وانا بكتب
الوصية وبالتالى مافيش ايدى مرتعشة ولا قلب حزين ولا عقل
مستسلم غير لاجمل بيتزا بيت والدتى عاملها .. تسلم ايديها
وصيتى

لكل اللى هيقرأ الوصية لانه يعرفنى ومستنى حاجة منى
بخصوصه سواء ايجابية كانت او سلبية ... ولكل اللى هيقرأ
الوصية بدافع من الفضول وحب الاستطلاع والمعرفة ... ولكل اللى
هيقرأ الوصية صدفة وبترتيب من القدر ...
تحية طيبة وبعد ...

كلنا فى حياتنا بنمر بعلاقات ... منها الجميلة اللى بتفرح قلوبنا
لما بتجى فى بالنا ومنها الصعبة اللى بتأذى مشاعرنا بمجرد سماع
سيرتها ... كلنا بنعدى فى حياتنا بمراحل حلوة ناس فيها بيقدمو
فيها قلوبهم تغيرنا وتحولنا لبالين بتطير من الفرحة فى الهوا
عشان تلمس السما ... ومراحل اصعب فيها ناس نهبوا اجمل ما

تسروقه الروح

فينا وغيرونا لكائنات عتمة مش حاسة بالامان او الحرية وسقف حياتنا لحظتها اقرب ما يكون للارض ... كل علاقاتي الحلوة منها او الصعبة علمتني وقربتني لاهم ما فى مبادئ الحياة .. الله هو مصدر السعادة الغير قابلة للزوال ... فكونوا مع الله .. وصيتي الاولى

فى مكتبى صندوق ذكريات ... حاجات بسيطة لكن قد اية كانت بتفرق معايا .. صندوق ييحكى عن لحظاتي الحلوة فى عشق الحياة ... انا محتفظ فيه بكل المكافآت البسيطة اللى كنت باخذها فى الدروس الخصوصية لاننى كنت شاطر اوى .. انا محتفظ فيه بخصلة شعر لاول بنت حبتها فى المدرسة وهدايا برغم بساطة قيمتها لكن كانت بالنسبة لقلبي حاجات بتفرق ... انا محتفظ بصور فيه لكل السفريات واللحظات المهمة والحلوة اللى قضيتها مع اصحابى ... انا محتفظ فيه باول عقد عمل مع دار نشر لنشر اول كتاب فى حياتى ... كل ذكرى سابت فى قلبى علامة لقيمة العمر ولقيمة الضحكة ولقيمة الحزن احتفظت بيها فى الصندوق وكأنى احتفظت بيها بقلبي ... اللى عاوز ياخذ الصندوق دة لازم يكون عنده مبادئ بساطة اللحظات الحلوة .. سيبنوا الحياة تفرحكم وتمسكوش فى الحزن ... ولو قسيت الحياة مرة افتح صندوق ذكرياتكم واضحكوا ... وخلي بالكم من كل لحظة فى عمركم وادولها حقها فى الاهتمام والتقدير مهما كانت بسيطة ... وصيتي الثانية

شروقه الرود

على اللاب الخاص بيا يومياتى اللى بكتبها وديوان شعر للبننت
الى حبتها ... الكتابة فى حد ذاتها حرية لكل شئ مسجون جوانا
... الكتابة اداة تساعدك على انك تخرج كل اللى جواك بصدق
وبايمان ... الحروف زى الاصحاب بالظبط بتخليك تفضفض
وتحكى وهى بتكون مستعدة انها تسمعك فى اى وقت .. العالم
يقدر يرفض يسمعك لكن الكتابة عمرها ما هترفض حضورك فى
عالمها .. الكتابة صاحب جدع يقاسمك على الحلوة وعلى المرة ..
جايز اكون مش مناسب للبننت اللى حبتها لكن جايز لما تقرا يومياتى
واشعارى عنها تعرف قد اية انا حبتها ... جايز يكون الكلام
المسجون فى الورق مش كفاية فى وصف مشاعرى ليها .. عبر عن
مشاعرك وامنح روحك براح كفاية انها تتحرر من اى قيود واكتب
يومياتك .. حب بأقوى ما فىك ولما اعراض الحب تظهر عليك
متحبسهاش فى سجن الخوف ومهما كانت النهاية استحالة هتتدم
على اى مشاعر صادقة ... وصيتى الثالثة

اتمنى جنازة هادية ميكونش فيها بكا او صراخ .. الموت مش
هيوجعنى ومش هياذبنى .. الموت اقصى قدرته انه يوجع الاحياء
من الفراق ... وانا افكارى ومشاعرى هتفضل عايشة وسطكم فى
قصصى وقصايدى .. مش عاوز نميمة ومش عاوز حقد ومش عاوز
حسد ومش عاوز حتى مدح ... مافيش داعى لدموع تماسيح او
تعليقات ساخرة يكفينى الصدق اللى فى قلوبكم حتى لو كان مش
فى صالحى ... انا فى لحظة الحقيقة مع الله مش هتصدم من

حقيقة النفاق من اى شخص حواليا ... اتمنى جنازة كبيرة يكون فيها كل اللى حبتهم حتى لو هما محبوبينش ويكون فيها اللى بيكرهنى بيصلى عشانى من باب الرحمة ... لا داعى لتابوت انيق وغالى التمن فالجسد فى النهاية تراب ... ولا داعى لكتابة اسمى فى صفحة الوفيات ولو عاوزين تنزلوا نعى اكتبوه فى مجلات ميكي لانها مجلاتى المفضلة مهما كبرت وحلم طفولتى انى ابقى بطل من ابطال والت ديزنى .. وصيتى الرابعة

لو فنجان الامل سادة ولسه اجمل يوم مجاش اجرى انتى على الحياة واخرج من دايرتك واحلم .. ماتركنش على الرف وتستنى الفرص تكون جاية على مقاسك واحلم ... اقتتص كل لحظة حلوة فى دنيتك وخليها سند ليك فى بكره .. الاحلام متعرفش الانتظار .. شد الشروق من الشمس واسرق النجوم من الليل واملى حياتك ورد وخلي احلامك كيف .. وصيتى الاخيرة



الفهرس

٣	مقدمة
٥	الله العظيم الابدى
٩	من بكره فركش ... ربنا مش هيبقى ربنا ...
١٥	أغبى رجل فى العالم ...
١٩	العالم الافتراضى ...
٢٣	يوم الاثنين كلمة أبيحة ...
٢٧	فن الاستهبال
٣٣	السحر
٣٧	هو ليه الحب مخدنهوش فى المدرسة ؟
٤١	أجمل ضعف
٤٥	فرسان طروادة
٤٩	شلل الروح
٥٥	التجارب
٦١	أتوبيس أسيوط
٦٥	لمسات مسروقة
٦٩	اتعلم اشكر
٧٣	خطاب لدولة فشخلانكا
٧٧	العصفورة
٨١	المزيكا
٨٥	كل سنة وأنا طيب
٨٩	طاقة نور
٩٣	اللغم
٩٧	الفرح
١٠١	جواده الخشبى يطير
١٠٥	وصيتى